

T 2259.7/1631



Harvard College Library Imaging Services <http://imaging.harvard.edu>

CM	0	1	2	3	4	5	6	7	8	9	10	11	12	13	14	15	16	17
Lab D50 2'		95/0/2	81/0/0	66/0/0	51/0/1	35/0/0	20/0/0	29/19/54	55/-39/33	42/57/29	82/4/79	51/50/-13	50/-28/-29					
		38/14/16	66/16/18	50/-5/-22	43/-14/21	55/-9/-25	71/-32/0	62/34/60	40/9/-43	52/48/17	31/21/-21	72/-23/57	73/19/68					

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
SEP 1 1938

國朝列卿紀卷之一百一

庚寅冬日門人方玄成謹較

總督漕運兼巡撫鳳陽等府

哈佛大學漢和  
圖書館珍藏印

夫憲臣總漕者非古制也自大禹以司空平水土以水紀諸州  
貢道蓋後世漕運之端周官有開渠築堰導河益漑各職而漕  
法未講至漢元光三年天子使鄭當時爲大司農嘗奏漕渠地  
節中郭昌則以光祿大夫使行河北河平元年河隄使王延世  
則又以勞賜爵關內侯晉隋之間漕法或領於尚書或領於倉  
部侍郎雖官無定銜皆簡自廷臣其責任亦重且大矣唐百官  
工部尚書以下則有水部郎中員外郎各一人掌津澤渠梁運  
漕碾禮之事外則又有河隄謁者六人諸津令各一人迨開元

初李傑爲水陸運使而使之名始見十一年裴耀卿以黃門侍郎同中書門下平章事充江淮都轉運使而以崔希逸蕭炅爲副使而副使之名亦始此天寶則以韋堅充勾當轉運使第五琦充諸色轉運使劉晏則以戶部侍郎充諸道轉運使厥後韓滉杜棕崔紹緯皆以宰相充而諸道巡院皆統焉自裴耀卿言漕事進用者常兼轉運之職惟韋堅爲最若劉晏則以轉運爲已任嘗與元載書曰見一水不通思荷鍾而先往見一粒不運思負米而先趣故時最著名迨乾德以後始置諸道轉運使其使之名但曰勾當某路水陸計度轉運事官高者則曰某路計度轉運使雍熙四年并水陸路發運爲一司以右神武將軍王

繼昇掌之太平興國初皆曰使兩省以上則爲都轉運使又置副使與諸路判官又置同勾當轉運事俄罷諸路副使真宗每用兵或令都部署兼轉運使王師征討則有隨軍轉運使事畢卽停熙寧初詔河東河北陝西三路漕臣許乘傳赴闕留無浹日又詔漕臣令自辟屬各二人以京朝官曾歷知縣者爲之宜和初又詔陝西以都漕兩員治於長安而漕臣三員分領六路時知名者若魯宗道若蔣之奇若張綸若許元芳張方平嘗畫漕運十四策宰相富弼讀其奏上前上太息稱善崇寧初蔡京爲相始求羨財以供侈費充使者遂有進獻而職墮矣元世祖中統二年始立軍儲所尋改漕運所至元改漕運司又改都漕

運司十九年改京畿都漕運使二十四年內外分立兩運司其員則有運使有同知有副使有判官而押官隸焉其初漕法猶有可觀歷歲既久弊日以滋疲三省之民力以充歲運之恒數而押運監臨之官與夫出納之吏恣爲貪黷至元之後有不可勝言者矣迨我太祖奄有天下貢賦之外海運以營遼東五十年嘗命靖海侯吳禎率舟師往運後又遣都督朱壽張赫領之二十年冬十月戊申朔享太廟封壽爲舳艫侯赫爲航海侯又嘗建漕運使尋罷成祖續承大業建立漕運而革使職乃命武職重臣總理景泰二年因漕運不繼特命都御史王竑總督與總兵叅將同理其事隨該吏科給事中李瓚題准淮揚廬

鳳四府徐和滁三州就令王竑兼管巡撫監督常盈倉遂爲定制而治必於淮者蓋淮左江右河東控海道北接兗豫西接兩都諸陵咸在况淮古稱難治故曰淮夷國初駙馬都尉黃寶嘗鎮守於斯至今不改轍焉故京操十二營軍有十二萬漕有十二總軍亦有十二萬中外相援兵食相資豈無謂哉惟總漕兼巡撫肇自景泰二年至成化八年改巡撫總漕各設一員九年復舊正德十三年又改各設一員十六年復舊嘉靖三十六年又改各設一員四十年復舊其巡撫自永樂十九年命吏部尚書蹇義巡行南畿考察官吏至宣德五年始命刑部右侍郎曹弘巡撫正統八年又命工部右侍郎王永和巡撫十三年又命

刑部右侍郎薛希璉吏部尚書趙新相繼巡撫然未奉漕命故  
 另列表首今詳漕臣宦履於後其行實見於事紀其勲德茂著  
 者表為列傳若奉 勅清理田地賑濟饑民并考察官吏有事  
 淮甸不可以類附者亦另別於後

國朝列卿紀卷之一百一

勅使淮南尚書侍郎都御史年表

虞

謙

直隸金壇人永樂八年以都察院  
 右副都御史巡視淮揚徐州旱災

鄭

綱

河南南陽人永樂九年以工部  
 侍郎巡視江淮山東救荒撫民

蹇

義

四川巴縣人永樂十九  
 年以吏部尚書巡視

朱

侃

浙江海鹽人永樂十九  
 年以左通政督漕運

周

忱

江西吉水人宣德五年前以工部右  
 侍郎總理糧儲正統初命巡視虧課

何文淵

江西廣昌人正統元年以刑  
 部右侍郎清理淮揚鹽法

賈

諒

山東嶧縣人正統二年以都察院右  
 副都御史救荒并捕治反獄強賊

薛希璉

浙江麗水人正統八年前巡撫  
 以刑部右侍郎清查軍民田土

耿九疇

河南廬氏人正統十四年以刑部右侍郎賑濟江北清理鹽法

江淵

四川江津人景泰二年以內閣巡視淮徐

王暹

浙江山陰人景泰三年以河南巡撫右都御史考察鳳陽賑濟徐州

鄒幹

浙江餘杭人景泰四年以禮部右侍郎賑濟鳳陽

王儉

四川銅梁人天順元年以都察院右僉都御史賑恤淮揚

林聰

福建寧德人天順三年以右副都御史捕江准郡盜成化二年以右副都御史賑恤江北

吳琛

直隸繁昌人成化元年以右僉都御史賑恤淮揚

馬顯

直隸廣平人成化六年以南京兵部右侍郎巡視鳳陽等郡

喬毅

山西樂安人成化七年以工部右侍郎督漕淮揚

王璟

山東沂州人弘治十四年以右僉都御史理兩淮鹽法

何鑑

浙江新昌人弘治十四年以刑部左侍郎賑濟山東兗州直隸徐邳等州大旱

王華

浙江餘姚人弘治十六年以南京吏部右侍郎賑恤淮揚

王瓊

山西太原人正德元年以副都御史總督鹽法

叢蘭

山東文登人正德七年以戶部右侍郎兼僉都御史賑濟

席書

四川遂寧人嘉靖二年以南京兵部右侍郎賑濟江北饑民

劉玉

江西萬安人嘉靖三年以刑部右侍郎賑濟淮揚

黃臣

山東濟陽人正德辛未進士嘉靖六年以右副都御史總理兩淮鹽九年回籍

王璣

浙江西安人嘉靖己丑進士三十年以右僉都御史提督徐兗農田三十二年回籍

王紳

直隸滄州人嘉靖己丑進士三十年以右僉都御史總理兩淮及浙江等處鹽法三十二年回籍

吳鵬

浙江秀水人嘉靖三十二年以刑部侍郎賑濟徐邳饑民

朱衡 江西萬安人嘉靖四十四年以工部尚書兼右副都御史總理河道漕運

江北巡撫侍郎都御史年表

曹弘 湖廣益陽人永樂乙未進士宣德五年以刑部右侍郎巡撫正統二年卒於官

王永和 南直隸崑山人正統八年以工部右侍郎巡撫十年回部

薛希璉 浙江麗水人正統十年以刑部右侍郎巡撫保定淮安十二郡

趙新 浙江富陽人永樂乙酉舉人正統十三年以吏部右侍郎巡撫十四年陞吏部尚書照舊任景泰二年養病卒

景泰二年以後俱總漕兼管巡撫正德十三年至十六年漕運

巡撫各設官尋復舊嘉靖三十六年又分設四十年復舊

李遂 江西豐城人嘉靖丙戌進士三十六年以右僉都御史巡撫鳳陽等處提督軍務

唐順之 南直隸武進人嘉靖己丑會元進士三十八年以右僉都御史巡撫三十九年卒於官

劉景韶 湖廣崇陽人嘉靖甲辰進士三十九年以右僉都御史任四十年閑住

嘉靖四十年歸總漕兼理

總督漕運兼撫鳳陽尚書侍郎都御史年表

王竑 陝西河州衛人進士景泰二年以左僉都御史任加左副都兼巡撫江北天順元年除名五年復任

陳泰 福建光澤人永樂癸卯解元天順八年以右副都御史任成化年致仕

滕昭 河南汝州人舉人成化二年以右副都御史任陞兵部右侍郎

陳濂 浙江鄞縣人進士成化六年以右副都御史任七年丁憂後起撫保定

張鵬 直隸涿水人進士成化七年以左僉都御史任

李裕 江西豐城人進士成化十年以右副都御史任

李綱 山東長清人進士成化十四年以左僉都御史任十五年卒於官



張 瓚 湖廣孝感人進士成化十五年以左副都御史任十九年卒於官

徐 英 四川中江人進士成化十九年以右副都御史任二十年致仕

劉 璋 福建南平人進士成化二十年以右副都御史任

馬文升 河南鈞州人進士成化二十一年以右都御史任

李 敏 河南襄城人進士成化二十二年以右副都御史任

丘 鼎 江西貴溪人進士成化二十三年以右副都御史任弘治元年致仕

秦 紘 山東單縣人進士弘治元年以左副都御史任

李 昂 浙江仁和人進士弘治二年以右副都御史任三年致仕

張 璋 直隸景州人進士弘治三年以右副都御史任七年致仕

李 蕙 直隸當塗人進士弘治七年以右副都御史任十二年加右都本年乞歸展墓卒於家

徐 鏞 湖廣興國人進士弘治十二年以右副都御史任本年卒於官

張 敷華 江西安福人進士弘治十二年以右都御史任歷都察院左都御史

張 縉 山西陽曲人進士弘治十四年以右副都御史任

洪 鍾 浙江錢塘人進士正德元年以右都御史任歷都察院左都御史太子太保

王 瓊 山西太原人進士正德二年以右副都御史任

李 瀚 山西沁水人進士正德二年以右副都御史任

邵 寶 直隸無錫人進士正德四年以右副都御史任本年忤逆瑾致仕

屈 直 陝西華陰人成化甲辰進士正德四年推左副都御史未任致仕

陶 琰 山西絳州人進士正德五年以左副都御史任

張 縉 見前正德六年以右都御史再任九年乞休

陶 琰 見前正德九年以右都御史再任十年致仕

叢 蘭 山東文登人進士正德十年以右都御史任十三年專理巡撫

臧 鳳 山東曲阜人進士正德十三年以右副都御史專督漕運十六年改專理巡撫歷南刑部尚書

許庭光 河南河陰人進士正德十六年以右副都御史專督漕運未至改巡撫四川

陶 琰 見前正德十六年以右都御史三任

俞 諫 浙江桐廬人進士嘉靖元年以都察院右都御史任

胡 錠 直隸長垣人進士嘉靖二年以右副都御史任陞南京戶部右侍郎

李 鉞 河南祥符人進士嘉靖三年以右都御史任歷兵部尚書

高友璣 浙江樂清人進士嘉靖四年以右都御史任

鄭 毅 江西上饒人弘治己未進士嘉靖六年以右副都御史改調未任致仕

唐 龍 浙江蘭溪人進士嘉靖七年以左僉都御史任歷吏部尚書加太子太保

毛思義 山東陽信人進士嘉靖八年以巡撫應天右副都御史改任改總理糧儲

陳 祥 江西高安人弘治壬戌進士嘉靖九年以右副都御史總理糧儲改調未任被劾聽調

劉 節 江西大庾人進士嘉靖九年以右副都御史任陞刑部右侍郎

馬 卿 河南林縣人弘治乙丑進士嘉靖十一年以右副都御史任十五年卒於官

周 金 直隸武進人進士嘉靖十五年以右都御史任十七年加左都歷南京戶部尚書

王 杲 山東汶上人進士嘉靖二十年以右都御史任二十一年陞戶部尚書

張景華 山東剡城人正德甲戌進士嘉靖二十一年以左副都御史任二十三年被劾閑住

周 用 直隸吳縣人進士嘉靖二十三年以工部尚書兼右都御史任歷吏部尚書加太子太保

王 暉 應天句容人進士嘉靖二十三年以右都御史任陞戶部尚書

喻茂堅 四川榮昌人進士嘉靖二十五年以右都御史任陞刑部尚書

歐陽必進 江西安福人進士嘉靖二十六年以右副都御史推未任歷吏部尚書加至少保

韓士英 四川南充人進士嘉靖二十六年以右都御史任歷南戶兵部尚書

胡松 直隸績溪人進士嘉靖二十七年以右副都御史任歷工部尚書

龔輝 浙江餘姚人嘉靖癸未進士二十七年以右副都御史任陞工部右侍郎

魏有本 浙江餘姚人正德辛巳進士嘉靖二十九年由南京刑部侍郎推右都御史未任以前任乞致仕

何鰲 浙江山陰人正德丁丑進士嘉靖二十年以右副都御史任歷刑部尚書

應檟 浙江遂昌人嘉靖丙戌進士三十年以兵部侍郎兼僉都御史任改督兩廣

駱顥 四川富順人嘉靖癸未進士三十年以戶部侍郎兼僉都御史任三十一回籍

連鑛 直隸永平人嘉靖丙戌進士三十二年以右副都御史任三十二年閑住

吳鵬 浙江秀水人嘉靖癸未進士三十二年以兵部侍郎兼僉都御史任歷吏部尚書加太子太保

鄭曉 浙江海鹽人嘉靖癸未進士三十二年以兵部侍郎兼僉都御史任歷刑部尚書

陳儒 錦衣衛籍交趾人嘉靖癸未進士三十四年以右都御史任三十五年聽調

蔡克廉 福建晉江人嘉靖巳丑進士三十五年以右副都御史任歷南京戶部尚書

王誥 河南西平人嘉靖癸未進士三十六年

傅頤 湖廣沔陽人嘉靖壬辰進士三十七年以右副都御史任三十八年專督漕任陞戶部侍郎

章煥 直隸吳縣人嘉靖戊戌進士三十八年以右副都御史任督漕三十九年調督南儲謫戍

何遷 湖廣德安籍嘉靖辛丑進士三十九年以右副都御史督漕四十年陞南京刑部侍郎

胡植 江西南昌人嘉靖乙未進士四十年以右副都御史督漕本年降南京光祿寺卿

喻時 河南光山人嘉靖戊戌進士四十年以右副都御史督漕兼理巡撫四十一年改總督三邊

毛愷 浙江江山人嘉靖乙未進士四十一

王廷 四川南充人嘉靖壬辰進士四十

馬森 福建懷安人嘉靖乙未進士四十四年

張瀚 浙江仁和人嘉靖乙未進士四十五年以

方廉 浙江新城人嘉靖辛丑進士

趙孔昭 直隸刑臺人嘉靖甲辰進士

陳炯 江西臨川人嘉靖辛丑進士

王宗沐 浙江臨海人嘉靖甲辰進士

傅希摯 直隸衡水人嘉靖丙辰進士萬曆十一年由

李世達 陝西涇陽人嘉靖丙辰進士萬曆十一年以右副都

王廷瞻 湖廣黃岡人嘉靖己未進士萬曆十二年以右都御史兼

楊俊民 山西蒲州人嘉靖壬戌進士萬曆十三年起戶部右侍

楊一魁 山西安邑人嘉靖乙丑進士萬曆十四年以戶部右

侍郎兼右僉都總督漕運兼巡撫鳳陽十五年調用

舒應龍 廣西全州籍嘉靖壬戌進士萬曆十五年以戶部右侍郎兼右僉都總督漕運十八年陞南京工部侍郎

陳于陞 直隸曲周人嘉靖己未進士萬曆十八年由左副都陞工部左侍郎兼左僉都督漕

周 宋 江西安福人嘉靖壬戌進士萬曆十八年由大理寺卿陞兵部右侍郎兼右僉都總督漕運二十年改吏部卒

勅使淮南行實

虞謙字 直隸金壇人永樂七年以都察院右副都御史巡

視淮安揚徐旱災疏民疾苦發廩賑貸官為贖還所賣男女詳

大理寺卿

鄭綱字 河南南陽人洪武中釋褐國子監擢廣西左叅議

改兗州知府留心民瘼永樂五年陞山東左叅政七年陞工部

右侍郎九年命巡視山東江淮地方救荒撫民踰年卒詳國初

工部

蹇義字 四川重慶府巴縣人永樂十九年以吏部尚書奉

勅巡行南直隸安撫軍民考察官吏本年事竣還部詳吏部

朱侃字  
浙江海鹽縣人永樂十九年以左通政督漕運以  
稱職稱詳通政司

周忱字  
江西吉安府吉水縣人宣德五年以越府長史陞  
工部右侍郎巡撫江南總督糧儲然與淮揚接壤事多相關始  
至奏罷淮安徐州臨清三倉支米轉運之法以祛領漕軍民艱  
困於江都縣瓜州鎮江岸東浚三港建便民倉於港側令江南  
有司預修并守之限每年秋末蘇松常三府各運米貯於倉及  
冬初漕運江北三把總官軍駕船序泊瓜州以待南京戶部差  
官監兌其在淮安者亦如之定派兌正糧一石五斗五升淮兌  
則一石五斗運之衛所各出通關回繳漕規稱便利焉又築石

隄於瓜州南岸俾運行者不陷淖濘造巨艦操渡以免顛溺正  
統初淮揚被災鹽課虧欠勅忱巡視忱奏令蘇松常三府將  
餘米量撥一二萬石運赴各場收貯其米准作運民下年預納  
糧額聽竈戶以餘鹽於附近場分上納照時估領米於時米貴  
鹽賤民皆得食官亦得鹽上下賴之後江北大饑巡撫王竑與  
忱會議借江南餘米助賑始及三萬石忱笑曰計至來年麥熟  
須十萬石卽如數與之後始會疏奏聞忱前瓜州建置營築  
皆取辦餘米而不煩有司其通才大計爲不可及如此詳總督  
糧儲

何文淵字巨川江西廣昌人正統元年以刑部侍郎往淮揚理

鹽法惟私販情重者罪之餘從寬宥議者欲籍其家文淵力爭之全活者百餘家

賈諒字子信山東兗州府嶧縣人正統二年以都察院右副都御史巡視淮濟賑活饑民十餘萬督築固安隄河道疏通人不知勞三年徐州強賊反獄潛處芒碭間肆爲民患復奉命捕治還至荏平遭疾卒詳都察院

薛希璉見巡撫正統八年以刑部右侍郎奉命清理鳳陽等府軍民田地發奸摘伏無敢欺隱創造文冊式至今遵爲定規本年事竣還部

耿九疇字禹範河南盧氏縣人永樂甲申進士擢禮科給事中

累官刑部右侍郎正統十四年鳳陽歲凶盜起勅九疇往綏之九疇乃留英武飛熊諸衛軍耕守以杜奸寇覬覦之心招徠流民七萬餘戶一方晏然會有言兩淮鹽政廢弛復命兼理之於是奏罷易米法申飭條戒有加於舊尋復勅撫恤江北諸郡盡心宣力有遺愛焉又勅審錄諸郡大辟囚九疇曰洗冤澤物吾所願也凡以情得原者二十六人有婦人來何菊家者旣去而死其家訟菊與弟殺之菊誣服九疇驗其無實釋之後知殺者果仇人也服其明代還改撫陝西歷南京刑部尚書詳南京刑部

江淵字世用四川江津人景泰二年以內閣巡視淮徐詳工部

尚書

王暹字景陽浙江紹興府山陰縣人景泰三年以河南巡撫右都御史考察鳳陽官吏去留惟允又奉勅賑恤徐州饑民詳

河南巡撫

鄒幹字

浙江餘杭人景泰四年以禮部右侍郎賑濟鳳陽河南等處大水幹奏免本年稅糧民多受惠詳禮部

王儉字

四川重慶府銅梁縣人天順元年以都察院右僉都御史賑濟淮揚等處饑荒本年事竣回院詳都察院

林聰字季聰福建福寧州寧德縣人天順三年以右副都御史捕江淮郡盜擒其巨魁梟示脇從則用輕典盜以寧息成化二

年江淮旱人相食命以都察院右副都御史賑濟奏借江南糧及支運糧儲數十萬以給民且與之種本年回院歷官刑部尚書詳刑部

吳琛字輿璧直隸太平府繁昌縣人成化元年以都察院右僉都御史賑濟淮揚等處饑荒凡事有益於民者率以便宜行之而言多切直大忤權貴雖民賴以濟而謗益滋矣二年回院歷官總督兩廣軍務右副都御史詳兩廣

馬顯字文明直隸廣平人成化六年以南京兵部右侍郎巡視鳳陽等郡撫窮獨擊奸慝民賴安堵

喬毅字

山西樂安人成化七年以工部右侍郎督淮揚漕



運

王璟字

山東沂州人弘治十四年以右僉都御史理兩淮鹽法通變革奸私販屏跡十六年賑濟浙東

何鑑字世光浙江新昌人弘治十四年以刑部左侍郎賑濟山

東兗州等府直隸徐邳等州荒旱

王華字

浙江紹興府餘姚縣人弘治十六年以南京吏部右侍郎賑濟淮揚等處饑荒本年回部歷南京吏部尚書詳南

京吏部

王瓊字德華山西太原人正德元年以右副都御史總督鹽法

二年改督漕運歷吏部尚書詳吏部

叢蘭見總漕正德七年以戶部侍郎兼僉都御史賑濟八年改

督宣大軍餉

席書字文同四川潼川州遂寧縣人嘉靖二年以南京兵部右

侍郎賑濟淮揚等處饑荒本年回部詳內閣

劉玉字

江西萬安人弘治丙辰進士嘉靖二年以刑部右侍郎兼左僉都御史賑濟淮揚詳刑部

黃臣字

山東濟陽人正德辛未進士十四年以諫止巡遊

謫官十六年世廟即位復其官嘉靖元年命陞俸一級進刑

科右給事中二年時都察院疏請差御史巡鹽批答稍誤以未下閣臣票擬也臣諫曰我朝設立內閣處以文學之臣凡百章

國朝及明系 卷之一百一 十五 四万五十二  
奏先行票擬今使內閣虛代言之職中貴肆專擅之奸關係匪  
輕漸不可長容臣封還原本以重命令疏入卽改批如制陞工  
科都給事中五年真人張彥頽以府第被災請賜更造上從其  
請命有司作治遣內臣一人往督之於是臣等言頃者趙秦榮  
三王府災第詔行勘估計未嘗輕動土木誠愛民節用至意也  
今彥頽所請未經勘估輒以煩有司且遣中官往督是 陛下  
優容假借於彥頽者顧出親王之上也昔漢樂巴嘆酒殿廷而  
成都火滅今 陛下謂彥頽有道術而曾不能救其家之燬將  
焉用之請勿遽遣內臣下工部行勘估計便詔如前旨十三年  
任都察院右副都御史巡撫陝西十五年改總理兩淮鹽法

年回籍

王璣字在教浙江西安人嘉靖己丑進士三十年以都察院右  
僉都御史提督徐充農田三十二年回籍

王紳字子書直隸滄州人嘉靖己丑進士歷光祿寺少卿二十  
年陞順天府丞本年以都察院右僉都御史總理兩淮及浙江  
等處鹽法三十二年回籍

吳鵬字萬里浙江秀水人嘉靖三十二年以刑部侍郎賑徐邳  
饑民詳吏部尚書

朱衡字士南江西萬安人嘉靖四十四年以工部尚書兼都察  
院右副都御史總理河道漕運

江北撫臣行實

夫撫臣非奉漕命然巡撫淮甸實總漕巡撫之端故別著於首云

曹弘字

湖廣長沙府益陽縣人永樂乙未進士授刑部

司主事遷本司員外郎宣德五年初設巡撫以大臣薦陞刑部右侍郎巡撫淮南并山東等處地方時連歲饑荒人多餓死弘至驗其地之肥瘠豐凶均徭役儲粟穀給賑濟俵牛種簡孽牧殺婚禮諸所設施咸切民隱民甚德之正統二年卒於官

王永和字以正直隸蘇州府崑山縣人永樂甲午鄉薦任兵科都給事中正統八年以工部右侍郎巡撫十年回部十三年命

治徐州呂梁二洪本年回部詳工部

薛希璉字廷器浙江處州府麗水縣人正統十年以刑部右侍郎巡撫淮安等處并畿內保定等十二府興利除害軍民樂業十三年賑鳳陽饑民十四年改鎮福建累官南京刑部尚書詳南京刑部

趙新字日新浙江杭州府富陽縣靈峰人永樂乙酉舉人入國子監與修永樂大典十一年授工部屯田司主事二十一年陞吏部稽勲司郎中宣德五年吏部止有尚書蹇義左右侍郎久缺後蹇奏保文選郎中鄭誠陞右侍郎新事蹇媚且久因缺望言於蹇曰鄭誠做得趙新如何做不得蹇欲奏難於衆論久之

因江西稅糧逋負假以巡撫爲名保陞十二人爲侍郎新遂陞吏部右侍郎巡撫江西討平蠻寇察吏治詢民瘼時耕獲定征斂蠲浮費又勸民出粟賑濟饑民如吉水曾希恭胡有初等廬陵陳讓等各以出穀千石奏聞於上賜璽書賜褒爲義民遣行人賚勞仍命有司復其家又建議以漕淮之舟順載江西之粟兵農兩利每歲秋入覲及還執政少師楊文貞文敏少傅王文端等各賦詩紀其績正統四年還朝調吏部右侍郎蒞事南京掌部事之

詔天下教官員缺旣多監生能作三場文字考選充之於是新同南京禮部右侍郎陳璉會祭酒陳敬宗掄選本年十月調南京禮部右侍郎時尚書省革新掌部事

一切禮文學校裁處有方七年給由復職九月思父在家年九十一歲具疏陳情准給假回籍八年正月復任二月丁父憂十年十月起復仍改吏部右侍郎怙勢自用時考功郎中彭勗負時名行事公直不可私干與新不合新面以言誘之勗曰勗所知守成憲以合公論耳若徇時干位非素志也遂奏勗學行雖優疎於吏牘宜調爲郡不報已而竟用闕補山東按察司副使士論不能平尚書王文端雖極知重之被其挾制而莫能主也十三年江淮多事出爲巡撫山東并淮安等府十四年敘前後九年考滿加吏部尚書仍舊巡撫景泰二年養病卒於道

總漕撫臣行實

王竑字公度陝西河州衛人正統己未進士擢戶科給事中歷都察院右僉都御史景泰二年因漕運不繼非專官不足以一人心轄百司特命竑總督漕運與總兵官叅將同理其事自通州至揚州水利有當蓄洩者督所司行之該戶部題該吏科給事中李瓚題淮揚廬鳳四府徐和滁三州就令竑兼管巡撫監督常盈倉糧儲既至政先鋤奸墨貪吏聞風多遁去其逮問者無所寬假悉置諸法閭閻豪右夙肆橫侵者必捕罪之由是戢戒毋輒犯一時吏民咸畏其威如神明然天順元年追論廷擊事放歸公時按廣陵得報從容自如解衣市小舟以行五年起用經略陝西尋改蒞淮揚適歲大饑卽先發漕米數萬石賑後

乃具疏劾罪又先任曾與江南巡撫周忱會借餘米十萬石以足民食二公皆先發後聞今江淮人稱名巡撫必曰王公周公者蓋以一時二公忠愛才力俱不可及云

陳泰字吉亨福建邵武府光澤縣人儀度修整言簡而有章淹貫經史喜爲詩永樂癸卯發解鄉闈宣德丁未會試乙榜除直隸安慶府學訓導以得教育英才爲樂正統丁巳廷臣交章薦其賢擢爲江西道監察御史累奉命巡按貴州山西山東諸藩克振風紀奕奕有重名在貴州都指揮宮聚素桀驁聞泰至不敢肆其奸大軍征麓川歲取士兵二千爲鄉導將士或失利輒殺士兵以爲功泰奏罷之夷人仰戴如父母越數月召還調

陝西道各道有疑獄皆以決於泰無或稱冤者在山西會南北  
圻旱澇相仍 詔下求直言衆皆以爲天災泰獨言洪範庶徵  
皆由人事乞罷大臣不職者以格休徵於是都御史陳智侍郎  
李庸祭酒貝泰御史成■等皆罷去又奏舉山西藩憲及州縣  
官之貪殘者悉置之法在東藩以憲多匪人陳疏懇懇數千言  
大要以選賢去奸爲治本 上嘉納之擢爲四川按察司按察  
使不踰年而蜀大治鎮守都御史寇深忌其才名陰諷所私叅  
議陳 誣奏泰杖殺人下刑部獄其人實自溺水死久而始白  
復官已巳虜寇內侵命協同將臣守備紫荆關及巡視沿邊諸  
寨景泰改元陞大理寺右少卿守備白洋口轉都察院右僉都

御史鎮守易州節制紫荆倒馬等關及沿河關口三十六處泰  
早夜究心畫計忘其勞虜知有備遂遁去及考察大名廣平順  
德河間諸府衛官吏去留咸當人心既而三上章辭位不聽命  
益勵勤以圖報稱甲戌陞左僉都御史疏理徐州呂梁二洪及  
臨清濟寧諸處河道丙子巡撫蘇松常鎮及嘉湖諸大郡泰蒞  
下嚴而不苛爲政清明吏不能高下其手以侮公法天順改元  
以讒言左遷廣東按察司副使連丁父母憂去壬午服闋復左  
僉都御史加賞賚巡撫四川蜀中老穉皆熟泰名聞泰至奔走  
相賀曰陳憲使復來矣蜀其將安以嬉乎州郡望風解組者數  
百人甲申陞右副都御史巡撫淮揚等處兼督漕運軍民皆安

國朝及外紀 卷之二十一 四百七十三  
之成化改元上章乞歸辭甚切 上念其効勞有年賜允薦紳  
大夫宴餞於都亭車蓋塞途都人聚觀以爲榮家居五年卒所  
著詩文有拙庵集奏議藁武陽志藏於家

蘇志云景泰七年陳公泰以右僉都御史巡撫知免租之 詔  
恩未得均又富室田多輕額其重者多在貧下乃推廣調停之  
令以五升之田倍其賦而官田之重者止取正額於是澤始均  
而賦額不損上下咸便而富者亦不怨也

滕昭字自明河南汝州人正統辛酉舉人任巡撫遼東左僉都  
御史成化二年以都察院右副都御史總督漕運兼撫鳳陽等  
府地方忘勢下賢官庶服其威量所部連歲大饑加意賑貸賴

以全活者數十餘萬人又奏准瓜淮水次允運官軍下年俱過  
江就各水次兌運六年改撫福建歷官兵部左侍郎詳兵部

陳濂字德清浙江寧波府鄞縣人正統乙丑進士授南京刑部  
主事明習文法一如素官時有鎮海戍卒故亡賴誣衛指揮以  
下數十輩不法事同獄者又代爲僞帖以質其奸株連逮繫乃  
以屬濂遂得其情法僞帖者而釋其餘譽益用起已乃署員外  
郎事景泰三年陞廣東按察司僉事天順三年轉副使巡視海  
道海故盜藪而圍山又瀕海盜勢猖獗濂輒親冒矢石出奇應  
變日夜露禱誓不與賊俱生忽雷電交作风雨晦冥盜迷瞶相  
擊殺俘馘無算海南肅然成化元年陞廣東左布政使四年陞

巡撫廣東右副都御史廣人頂盆欣戴頌聲大作時連歲兵興  
供應師旅勞止日甚濂懇懇矜惻如或傷之五年奉命總督漕  
運晝作夜惟勤疏濬嚴監督立程度輸運無後期兩淮故南北  
孔道諸豪家漁獵貨貨率多橫暴凌啖庶姓悉裁以法善良咸  
獲其所七年丁內艱去八年適河南缺巡撫上謂非濂不可  
者詔起復濂灑泣就道未幾又命巡撫北直隸兼巡紫荆諸要  
害九年上又以漕運事重還濂原任比至淮疾作卒於蘇  
張鵬字騰霄直隸保定府涑水縣人景泰辛未進士由御史陞  
福建按察使成化四年陞巡撫廣西右僉都御史改理南院七  
年以左僉都御史總督漕運巡撫奏准運糧軍缺許於成操雜

差內選補八年盜發境內專命巡撫以恩信爲治緝捕有方踰  
年盜息仍理南院事後歷兵部尚書詳兵部

李裕字咨德江西豐城縣人景泰甲戌進士任順天府尹成化  
十年以都察院右副都御史總漕運兼理巡撫綱運利弊罷行  
殆盡數運之後人人稱便張秋南旺湖淮安西湖諸防舊用椿  
木以捍衝激屢修屢壞費無已時裕檄郎中楊禁主事郭昇易  
之以石利垂永久又請議疏濬通州至京大通河道十四年丁  
憂累官吏部尚書詳吏部

李綱字廷張山東濟南府長清人幼自負志挺特不與凡兒狎  
讀書日記數千言下筆爲文不竊陳腐視世之侈靡者若將浼



已嘗侍父州判君來京家僮驅車行狹道中偶失脚墜轍下車從身橫過衆以爲必無全理已而不傷若有神護持之者識者曰大難無危後當遠到此其兆也既歸補邑庠弟子員景泰癸酉以詩經領鄉薦天順丁丑登進士授山西道監察御史慨然以功業自期明憲綱究律意舉大體略細故疏陳時政得失無所迴避其出巡南直隸浙江等處所至舉廉能黜奸貪風聲大振淮人有宦族子婦私通武弁子弟逾年情衰以強訴之時王巡撫威望嚴重訊問未畢子弟自誣服後綱按其事疑之詰其所自乃得實益前此嘗分艾灸指爲盟索癥視之宛然相對遂得減律不死在浙江時去賊吏四百餘人至有望風解綬至今

士大夫猶能道其事目爲鐵御史嘗奉勅於陝西延綏編集

士兵夷人性悍激之則變獨處置得宜得其心事竣回京陞太

僕寺少卿未三載馬政之弊革除殆盡時有幕職某人者素嗜

榮進累托中使能吹噓禍福者迫薦爲本寺丞綱毅然拒之終

不從出視馬政於真保定諸郡有司不敢歛一錢於民自府察

以下事不集者笞之行冀州道劇賊驅騎卒至乃從容解前馳

衣箱并鑰與之相去未百步賊指隸人曰此豈太僕寺李某耶

隸人曰然衆賊曰無錢無錢遂不開箱上馬徘徊有退謝之狀

未幾聞母喪守制於家上遣官諭祭州判君相繼物故前後

居六載喪事一依古禮足跡未嘗出門卽吉轉都察院右僉都

御史綱素諳憲事凡疏奏必取省閱會總督漕運都憲員缺陞  
左僉都御史賜勅俾行至淮奏准運船遭風漂流糧米者免  
送問未及二載運事畢舉人用大和至成化己亥六月三日以  
疾卒平江伯陳公卽淮安公館具棺斂如禮啟其箱視之惟敝  
衣數事而已他無一物陳公曰真君子人也爲上章乞葬祭許  
之得壽五十有五

張瓚字宗器湖廣德安府孝感人正統丁卯鄉試明年第進士  
己巳拜工部虞衡司主事甚有聲稱從石尚書璞督餉山西河  
南又從趙侍郎仁塞決河於山東沙灣裨益甚多二公才之湖  
廣白糧稅非土產爲患甚乃奏移於蘇松鄉民至今賴之遷郎

中會京畿民饑奏賑之而民大悅天順庚辰出守太原僅期月  
以憂去服闋改浙之寧波首定徭役法每十年而一變第其等  
有差於民甚便監市舶中官福住怙勢黷貨民罔堪命乃疏其  
罪而福住爲之奪氣及中以計章下監司幸以白而福住亦幸  
免其黨俱伏法成化丙戌遷廣東布政司叅政專總糧儲積弊  
久不能除請勅命軍衛有司悉聽裁處由是不律者始得繩  
之以法詔天下總糧者以此爲例彌六載遷浙江左布政使  
凡百利病悉興革之士民胥服甲午遷都察院右副都御史撫  
臨四川首條禁約數十事榜於通衢切中民隱播州大壩灣溪  
等所自正統中征之未服乃分遣宣慰使楊輝進攻斬首先後

計四百九十六級破十六寨餘諸苗素居化外者亦望風納款降其衆一萬三千八百餘人相其要會置官司以控制之凱旋乞歸省母得告卽行行至長壽聞喪會潘茂西番寇邊西鄙繹騷詔特起征之卽墨衰而往偕副總兵某相機征勦無何黃草壩暨龍州諸寨以次報平其任昌等四十五族不煩兵而下惟西坡等處負固寇擾如故進兵撲之破其七寨於是潘茂悉定奏功計破虜寨二十二斬首一千七十級俘獲人畜器械無算隨處修葺橋棧增築墩堡皆堅久之制又移築茂城於舊城南演武場廣袤加倍於舊居兵民若干家己亥夏四月告成於上仍終制於鄉五月召拜戶部左侍郎懇辭服闋改都察院左副

都御史命巡撫鳳陽軍人安焉尋以疾歿壽僅五十有五好學不倦所著詩文有土苴內外集議奏東征紀行錄征夷雜記又嘗刊程氏遺書伊洛淵源錄今盛行於世

徐英字時傑四川潼川州中江縣人天順丁丑進士授禮科給事中歷科左給事中吏科都給事中成化十四年陞順天府丞歷河南右布政使轉左十九年陞都察院右副都御史總督漕運兼理巡撫奏復漕運理刑官二十年致仕

劉璋字廷信福建南平縣人天順丁丑進士累官浙江左布政使成化二十年以右副都御史總漕運兼理巡撫時河南數州饑饉戶部主事張倫上言宋之漕運皆由黃河以達於汴今宜

國朝文獻通考 卷之三百一  
四百六十  
做此法漕運河之米往賑之有 旨命倫督運十萬石璋督運  
十七萬石倫蓋不知宋之漕運江不入淮淮不入汴以黃河之  
險非江淮之舟所能濟也璋乃選巨艘而高大其航檣募習黃  
河之水者操之通運二十七萬以往尋復奉 勅巡撫鳳陽等  
處既而湖廣鄖陽流民嘯聚 朝廷恐其滋蔓特 勅璋往撫  
治之詳工部

馬文升字負圖河南開封府鈞州人景泰辛未進士授御史累  
官兵部左侍郎以守正忤太監汪直謫戍重慶後從言官交薦  
起撫遼東樹奇績成化二十一年陞右都御史總督漕運兼理  
巡撫搜剔宿弊門無私謁於是逋逃之卒聞風皆歸末期陞兵

部尚書詳兵部

李敏字公勉河南開封府襄城縣人景泰甲戌進士授山東道  
監察御史累官兵部右侍郎養病成化二十二年起右副都御  
史巡撫保定 提督紫荆等關二十三年改總督漕運兼理  
巡撫政績安詳累官戶部尚書詳戶部

丘鼎字宗用初姓周江西廣信府貴溪縣人浙江右叅政旭鑑  
之孫也景泰甲戌進士 成化二十一年陞

四川按察使二十三年陞右僉都御史巡撫四川地方本年陞  
都察院右副都御史總督漕運兼理巡撫弘治元年致仕  
秦紘字世纓山東兗州府單縣人景泰甲戌進士授南京山西

道監察御史累官戶部右侍郎以忤時貴降廣西左叅政弘治元年太宰三原王端毅公素重其剛正特起左副都御史總督漕運益侃侃自樹風采蘄然會御史姜洪巡按湖廣令布政司抄案轉行湖廣稅糧事紘奏洪犯分刑科給事中陳璠等駁論紘怨已不明十三道御史論紘剛愎上以事干大體俱罰俸又令禮部會議調洪知縣說者謂朝廷處置洪等有體而紘所執奏亦關於憲體云未幾兩廣缺總制進右都御史總制兩廣兼理巡撫累官詳戶部

李昂字文舉浙江杭州府仁和縣人景泰甲戌進士除工部都水司主事改兵部車駕司陞山東青州府知府年始二十有一

以其少未更事爲慮至則廢政悉舉郡中稱治凡八年闢田至五千七百餘頃賑饑民百二十萬而復業者五萬二千五百將滿去民狀政績三十有四事上於巡撫大臣願留終惠一郡俄陞福建布政司右叅政民懷思不已刻像於表海亭列邑皆祠祀或有冤不得申者輒走祠下愬之其得民如此丁內艱服除改山東尋進右布政使舊治民鼓舞而迎者載道再轉河南左布政使時值歲歉悉力賑恤又吏弊多端作吏範門約禁典以戒飭之四月適江西盜起贛州聚衆劫掠會昌信豐諸縣殺郡縣官其勢甚熾遂擢都察院右副都御史以往時官吏因循多不用命痛繩以法乃議立營堡壓賊巢穴使不能出別募勇敢

士與民同操習已而進兵賊聞風皆披靡斬獲不可勝數事聞朝廷賜勅獎諭昂以今賊雖滅當立守禦計蓋會昌與福建接境萬山阻絕爲上杭武平流賊所聚雖嘗有兵守禦而寡弱不支宜卽會昌武平立行都司以統諸衛乃創巡檢司於龍南要地庶得無虞奏上皆從之賊平疏乞致仕不從移總督漕運兼巡撫鳳陽等府地方以國重務推究其利弊而罷行之以江西怨家騰謗去位昂爲人精勤明敏才氣沛然遇事能爲若無難者性尤孝友每恨早孤語及其父輒嗚咽不已奉母夫人能盡色養事兄及二姊恭謹其賢又可稱也素好文翰所著述多有可觀有文集四卷奏議二卷藏於家

張瑋字汝器直隸河間府景州人成化丙戌進士擢監察御史性剛介寡言笑舉彈無所避十五年己亥擢陝西副使政尚嚴不事姑息弘治二年以督餉有功陞都察院右副都御史巡撫寧夏二年改總督漕運兼理巡撫七年致仕進階正治上卿卒於家

李蕙字德馨直隸太平府當塗縣人成化己丑進士觀政大理寺明年會給事中員缺選刑科居數月適京師米貴詔發倉儲五十萬石分官監糶以平其價民擁道不時得米蕙蒞通州倉設法以給糶者人皆稱便才名始起後再偕中官給賞軍士衣巾等物能革宿弊乃條陳給賞新格以上詔行其言戊戌

丁母憂服除還任壬寅擢四川布政司右叅議時有中貴怙勢挾儉人徧歷南方索寶玩行至江西蕙抵任適三日方分守南昌道卽偕行列郡耳民窮困激之恐生變中貴聞之歛威一時民不大擾歲滿分守嶺北更守湖東斷事皆如神民益稱頌在湖東時上饒饑民數人乞米於富家不得遂強取之郡捕其人以盜論蕙曰此輩迫於饑出於不得已然耳悉薄其罪恐長亂不可特罪其爲首者餘從未減獄始平後四年南贛盜發巡撫大臣議發兵勦除以蕙舊有善政服其民且熟知地形險易檄蕙行至則令駐兵傍縣白於大臣曰前許諸盜自新此舉非詔意今宜招撫之使不從用兵未晚也用其言賊黨相率散去惟

獲渠魁數人戮以示戒而已事聞蒙厚賚弘治戊申擢本司左叅政有薦其才可大用者遂擢山西右布政使踰年轉左布政使初本司公文出入吏緣爲奸莫能窮其故至則痛治之而奸弊始悉改乃因俗爲治惠澤多及於民有畫像以奉之者癸丑陞都察院右副都御史總督南京糧儲明年朝廷以漕運事弛當易其人遂轉左副都御史兼巡撫四府故事天下巡撫官凡有利弊具疏奏上歲八月畢至京會議後其地或有水旱盜賊等事多不至總督漕運者至如常前後所上二十餘疏得與部院諸大臣可否事多施行內如奏定江南造船料價期限并定運糧軍職勤惰衛所不補運軍分數叅問之例及運糧逃

軍問發沿邊守墩瞭哨江西湖廣僻遠山縣免運糧米折銀給  
軍爲輕齎外江漂流糧船有司勘實免送問久雨違限運官免  
叅問與夫衛所掌印官監同運糧委官徵收減存運軍該辦料  
銀俱情法兼盡軍士困於運輸者方幸稍蘇久之拜右都御史  
以褒嘉之而俾總督巡撫如故更遣中使賜以寶鈔羊酒以  
勞之又二年卒於官爲人疏達明敏遇事能變通法務平恕入  
仕三十年尤以廉謹自持人無可議者居家事母孝母病必躬  
扶持久而不倦待二弟有恩季父異爨已久後稍貴復請居同  
養之至人有德於己雖在幼時終身不忘其心之厚如此平生  
喜交游好吟咏與士大夫文翰往來動盈卷帙有粹英集藏於

冢

徐鏞字用和湖廣武昌府興國州人登成化己丑進士第授行  
人拜監察御史巡視通州時濬大通河鏞獨疏不可旣而漕舟  
果不達按閩還以災異論列却貢獻正課程革奸弊均食四事  
臺長重之與同官共劾小人之附權臣者又極論名器之濫清  
汰冗官會星變請免慶成宴謫鎮原令值歲饑修預備倉掘地  
得窖錢十萬大周貧乏及代流亾輸累歲逋課改臨潼父老泣  
送之弘治二年薦舉起陞淮安府知府值歲大稔積雪凝凍民  
間食絕鏞亟修糴賑之法循行郡邑勘課農桑歲遂大豐民孤  
獨無告及不能婚葬者諭富室助之郡學荒圯修葺恢擴之八



年陞廣西右叅政十一年陞河南右布政使本年陞河南左布政使十二年陞都察院右副都御史總督漕運巡撫奏准借太倉銀應水陸搬運脚價用本年卒於官准人祀之名宦名臣二祠

張敷華字公實號介庵江西安福縣人天順甲申進士改庶吉士弘治九年歷南京兵部右侍郎十三年陞都察院右都御史總督漕運首黜武臣部運尤無良者權貴干請悉拒弗納近例漕司多假太倉官銀少免利息敷華謂逋負乃下剝上攘所致而官爲借貸大非政體峻爲之禁高郵諸湖隄久且壞乃爲深溝數道以緩湖水寶應地多平陸又趣令築隄隄成而水至又

奏准江西南兌糧折銀二十五萬石每石六錢又因久雨奏改京倉糧五十萬石於通倉收又於運河爭競奏准軍民運船與王府官校船兩岸分行十四年改南京都察院右都御史掌院事歷左都御史掌院事詳都察院

張縉字朝用山西太原府陽曲縣人成化己丑進士初知鈞州以內艱歸終喪改知滄州居南北之衝且頻病雨潦多方賑救民賴之安權貴欲請境內地爲莊田縉不可其事乃寢陞南京工部郎中剷除宿弊羣匠故囊橐爲奸利者無所容未三年陞杭州府知府在郡八年節縮百費省民財十有餘萬陞山東叅政弘治癸丑河決張秋上命平江伯陳銳都御史劉大夏治

之百需悉委調度及功成遂陞其秩爲通政司右通政屬之行河時衝決之餘溝防不治縉相其緩急以漸修濬無所遺又於決口之東甃石岸數里以圖勿壞又新築南旺東堤樹柳其上每歲夏秋水溢挽卒得分行無阻至今便之庚申八月陞都察院右僉都御史巡撫保定等府疏陳八事皆切民病辛酉四月陞右副都御史巡撫宣府虜入遮擊屢有斬獲之功是歲十一月改督漕運造舟之價必預給漕卒必選其精壯者補之癸亥甲子淮揚連歲告饑奏留糧米若干萬石所全活者甚衆丙寅陞戶部左侍郎時逆瑾惡不已附者會南京戶部尚書缺以縉往補而卽因事逮之時同逮皆復官惟縉致仕過滄滄人留止

之乃家於滄然瑾銜縉未釋也復與尚書韓文同下詔獄罰輸邊米五百石又坐前揚州災嘗改兌運二萬五千石於鳳陽上納瑾以爲更制除其名未幾復召爲右都御史仍督漕運兼淮南勦賊事至則選鋒追勦又設伏以遏其衝賊圍邳縉素知東海千戶張瀛者以謀勇稱遂令率健士開南柵迎敵有三騎突來蓋賊魁也皆中矢斃其黨遁去城乃完七月賊捨騎入江縉於儀真於瓜洲皆嚴兵以待旣而賊平上勞以璽書金帛時境內累經兵燹民物凋瘵又加意撫綏漸有生意然縉亦老已倦於勤矣凡七疏乞休不允甲戌以入議至滄不進復疏乃許之仍復南京戶部尚書致仕詳南京戶部

洪鍾字宣之浙江錢塘人成化乙未進士授官刑部主事諳習  
憲典聲聞驟起庚子陞員外郎癸卯丁內艱丙午起復陞郎中  
尋慮囚山西丁未江西福建流賊甫定承命往審處之歸言  
宜及平時立社學以訓誨其子弟銷其兵器易之以詩書禮讓  
庶幾潛化其奸宄時以為知本之論弘治乙酉陞江西按察司  
副使癸丑陞四川按察使所在聽決如流庭無宿訟由是豪橫  
屏息自土宦宜慰司皆懍懍奉約束安民世有馬湖驕僭為地  
方患從容畫策去之請吏於朝遂以帖定丙辰陞江西右布  
政使丁巳轉福建左布政使著績兩省戊午陞都察院右副都  
御史巡撫順天等府兼整飭薊州諸邊備增築邊牆自山海關

界嶺口直抵居庸延亘千餘里繕復城堡二百七十悉城沿邊  
諸縣官無浪費而民不知勞奏減防秋官兵六千人歲省費以  
數萬創建浮橋以利病涉毀永平陶窰以息軍民橫役之苦奪  
民產及牧圍草場之入於權貴者而悉還之遠近大悅名稱籍  
甚然權貴人之扼勢失利者數短於上遂改雲南巡撫再改  
貴州頃之召還督理漕運兼巡撫鳳陽諸處正德丁卯陞右  
都御史仍董漕政戊辰命掌南京都察院事詳都察院  
王瓊字德華山西太原府太原縣人成化甲辰進士授工部屯  
田司主事弘治四年陞屯田司員外郎六年陞都水司郎中九  
年改戶部陝西司郎中十二年陞山東右叅政十四年守制十

六年補河南左叅政十八年陞河南右布政使正德元年陞都察院右副都御史整理兩淮鹽法二年取回本年改總督漕運未任尋陞戶部右侍郎累官吏部尚書詳吏部

李瀚字叔淵山西澤州沁水縣人成化辛丑進士十八年授樂亭知縣二十二年行取擢四川道監察御史弘治四年丁憂七年起復補浙江道監察御史十二年陞湖廣副使十三年丁憂十六年起復補河南副使十八年陞湖廣按察使正德二年陞河南右布政使尋轉本司左布政使本年五月歷順天府尹本年九月陞都察院右副都御史總督漕運三年陞本院左副都御史佐理院事詳戶部

邵寶字國賢直隸無錫縣人成化甲辰進士授許州知州能以禮讓爲國所舉動多風教事作新廟學毀龍骨杖妖巫尤急民事躬課農種做朱文公社倉立積散法行計口給田法爲備荒計釐正糧籍民至於今稱便弘治七年徵爲戶部員外郎十年進郎中操履清潔不可干以私政暇錄戶部條例并各處荒歉數目備記不遺而恤民隱惜財用朝省諮議多采之十二年陞江西提學副使至則以身爲教先行檢而後辭藝黜浮崇雅士類勃興十八年陞浙江按察使正德二年陞浙江右布政使三年轉湖廣左布政使鎮靜簡重足以革浮靡消澆訕而聲望益隆四年陞都察院左副都御史總督漕運時劉瑾用事一無

所通瑾銜之數令以危言撼之乞不爲動勒令致仕詳南京禮部

屈直字

陝西西安府華陰縣人成化甲辰進士授刑部

司主事歷

司員外郎

司郎中十年陞重慶府知府

正德元年陞河南左叅政二年陞浙江按察使三年陞河南左布政使未任本年陞太僕寺卿尋陞都察院右副都御史總督南京糧儲四年陞南京大理寺卿本年改都察院左副都御史總督漕運兼理巡撫乞致仕未任

陶琰字廷信山西平陽府絳州人成化辛丑進士正德五年以閑住刑部右侍郎起左副都御史任單車至鎮廉幸豎官民之

豪猾者悉治以法權勢斂手來往淮上者常廩之外毫不少假榜諭以法又自率以勤廉六年遷南京刑部右侍郎九年以右都御史再任七疏求歸十年得旨致仕十六年仍以右都再任進戶部尚書兼左副都御史仍任嘉靖元年遷工部尚書去之日淮民傾城出送易履以著去思歷南京兵部尚書詳南京兵部

叢蘭字廷秀山東登州府文登縣人正德十年以右都御史任兼撫鳳陽諸郡蒐剔宿弊改立條約著漕運錄權右以私貸訴償不理毀之十三年革漕運專理巡撫值歲饑截漕粟數萬益以倉賑之主事壬鑿忤中貴史宣逮獄疏白之中官劉允迎佛

使不與見疏乞斥曇老止允勿遣十五年陞南京工部尚書詳  
南京工部

臧鳳字瑞周山東兗州府曲阜縣人弘治庚戌進士授知浙江  
嵯縣累官河南左布政使陞巡撫順天左副都御史正德十三  
年以右副都御史專督漕運以漕政久弛悉心經畫選能以任  
功剔蠹以祛害十六年改兼理巡撫奏免常租裁縮冗費本年  
遷刑部右侍郎歷南京刑部尚書詳南京刑部

許庭光字  
河南開封府河陰縣人弘治己未進士歷巡視  
浙江右僉都御史正德十六年以右副都御史專理漕運未至  
改巡撫四川詳四川巡撫

俞諫字良佐浙江嚴州府桐廬縣人弘治庚戌進士歷巡撫江  
西右都御史乞休嘉靖元年起右都御史任兼巡撫至則清冤  
獄黜貪吏所至肅然思減推挽之費疏請三分折一上下稱便  
寶應湖水蕩囓堤岸命植茭蒲其側水患以平歲饑發粟賑濟  
全活甚衆河南賊寇淮西下車未半月平之有司誣良民爲功  
者審釋之二年回院掌都察院事詳都察院

胡錠字  
直隸大名府長垣縣人弘治己未進士嘉靖二年  
以右副都御史任三年遷南院歷南京戶部右侍郎詳南京戶

部

李鉞字虔甫河南開封府祥符縣人弘治丙辰進士正德十一

國朝列傳卷之二十一  
年任巡撫山西右僉都御史十三年回院嘉靖三年以右都御史任本年回都察院四年歷兵部尚書詳兵部

高友璣字肅政浙江樂清縣人弘治庚戌進士除南刑部主事歷南京刑部右侍郎嘉靖四年以右都御史任討誅鹽徒渠惡而招徠其衆革驛傳費一清宿弊六年陞南京工部尚書歷刑部尚書詳刑部

鄭毅字

江西廣信府上饒縣人弘治己未進士授南兵部

職方主事歷浙江左布政使嘉靖六年以四川巡撫右副都御史改調南院遷督漕運未任致仕詳四川巡撫

唐龍字虞佐浙江金華府蘭谿縣人嘉靖七年任太僕寺卿陞

都察院左僉都御史任首領吏誠以儆有位據利病之大者奏請興革之漕政久弛隨宜修治奏縮馳驛者之供索奏折徵官馬省費十五奏免正陽之權稅通泰無田之子粒漕卒之船料承命慮囚多所平反釋輕罪二千餘本年陞都察院右副都御史歷吏部尚書

毛思義字

山東濟南府陽信縣人弘治壬戌進士嘉靖八

年以右副都御史任九年改總理糧儲兼巡撫應天等處地方詳總理糧儲

陳祥字

江西瑞州府高安縣人弘治壬戌進士嘉靖九年

以巡撫應天右副都御史改調前職未任被劾聽勘詳前任總

理糧儲

劉節字介夫江西南安府大庾縣人弘治乙丑進士正德八年任四川提學僉事十五年任廣西提學副使嘉靖八年任巡撫山東右副都御史九年以原官遷任十一年遷刑部右侍郎詳刑部

馬卿字敬臣河南彰德府林縣人弘治乙丑進士改翰林院庶吉士正德二年除戶科給事中五年陞吏科右給事中本年陞工科左給事中六年陞大名府知府十年陞浙江副使十二年改山西提學十四年陞山右叅政嘉靖二年陞浙江右布政使四年降鶴慶府知府七年陞雲南左叅政本年陞雲南按察

使尋陞福建右布政使八年陞南京太僕寺卿本年丁憂十一年起光祿寺卿陞都察院右副都御史總督漕運兼理巡撫十五年卒於官

周金字

直隸常州府武進縣人正德戊辰進士任戶科都

給事中十一年陞太僕寺少卿嘉靖元年以都察院右僉都御史巡撫延綏四年改撫宣府本年加右副都仍任六年致仕十二年以原官起撫保定十四年陞兵部右侍郎十五年以右都御史任十七年加左都御史仍任前職二十年陞南京刑部尚書改南京戶部尚書詳南京戶部

王杲字

山東兗州府汶上縣人正德甲戌進士歷浙江道



御史嘉靖十二年陞太僕寺少卿十四年陞大理寺右少卿十五年陞都察院右僉都御史十六年轉左十八年陞左副都御史本年陞戶部右侍郎二十年陞總督漕運右都御史二十一年陞戶部尚書加太子少保詳戶部

張景華字

山東兗州府剡城縣人正德甲戌進士除吉水

縣知縣十三年丁憂十六年起復陞河南道監察御史嘉靖八年養病九年復原職十年陞大理寺右寺丞十三年陞騰黃右通政本年陞都察院右僉都御史巡撫順天等處地方十四年致仕二十年起用補都察院右副都御史佐理院事二十一年改本院左副都御史總督漕運兼理巡撫二十三年被劾閑住

周用字行之直隸蘇州府吳江縣人弘治壬戌進士嘉靖二十三年以工部尚書兼右都御史治河改任本年改都察院左都御史掌院事歷吏部尚書加太子少保詳吏部

王暉字

應天府句容縣人正德丁丑進士歷南京光祿寺

少卿嘉靖十二年陞太僕寺少卿十六年陞光祿寺卿十七年陞南京太常寺卿十八年陞巡撫江西右副都御史二十年陞南京戶部右侍郎未任二十一年陞戶部右侍郎二十二年轉左二十三年陞總督漕運右都御史二十五年陞總儲戶部尚書詳戶部

喻茂堅字

四川重慶府榮昌縣人正德辛未進士任

道御史嘉靖二十年任撫治鄖陽右副都御史二十一年改撫  
應天二十二年任南京大理寺卿二十五年以右都御史任二  
十六年陞刑部尚書詳刑部

歐陽必進字任夫江西吉安府安福縣人正德丁丑進士嘉靖  
二十六年以巡撫應天右副都御史改任本年改兩廣歷南京  
右都工部尚書都察院左都少保兼太子太保吏部尚書詳吏  
部

韓士英字 四川順慶府南充縣人正德甲戌進士嘉靖二  
十六年以右都御史任二十七年陞南京戶部尚書歷南京兵  
部改戶部尚書未任詳南京兵部

胡松字 直隸徽州府績溪縣人正德甲戌進士嘉靖二十  
六年任河道右副都二十七年改任本年陞戶部右侍郎二十  
九年轉左本年歷工部尚書詳工部

龔輝字實卿浙江紹興府餘姚縣人嘉靖癸未進士二十年  
以右副都御史任二十九年陞工部右侍郎調南京工部乞致  
仕詳工部

魏有本字曰深浙江紹興府餘姚縣人正德辛巳進士嘉靖十  
四年任大理寺右寺丞十五年轉左十八年陞本寺右少卿十  
九年陞巡撫河南右僉都御史二十一年陞總儲右副都御史  
二十三年陞南京大理寺卿二十七年陞南京刑部右侍郎二

十九年推右都御史總漕未任以前任南京刑部侍郎乞致仕  
詳南京刑部

何鰲字

浙江紹興府山陰縣人正德丁丑進士任御史嘉

靖二十五年歷巡撫山東右副都御史二十六年逮獄謫福建  
叅議二十七年任應天府丞二十八年陞總理河道右僉都御  
史二十九年以右副都御史任本年遷南京兵部右侍郎未任  
三十年改刑部三十一年歷刑部尚書詳刑部

應欜字子材浙江處州府遂昌縣人嘉靖丙戌進士二十二年  
任湖廣提學副使二十八年任巡撫山東右僉都御史本年改  
撫山西三十年以兵部侍郎兼僉都任本年改總督兩廣軍務

詳兩廣

駱顯字君孚四川敘州府富順縣人嘉靖癸未進士

六年任光祿寺卿二十七年陞巡撫山

東右僉都御史二十八年陞大理寺卿二十九年陞戶部右侍  
郎本年轉左三十年調南京戶部侍郎本年命改戶部侍郎兼  
僉都御史總督漕運兼理巡撫三十一年回籍

連鏞字伯金直隸廣平府永年縣人嘉靖丙戌進士

三十一年由總理河道右副都御史陞任

三十二年閑住

吳鵬字萬里浙江嘉興府秀水縣人嘉靖癸未進士十二年任

廣東提學僉事十七年改貴州丁憂二十二年陞雲南提學副使

三十一年以兵部侍郎兼僉都御史任詳吏部尚書

鄭曉字室甫浙江嘉興府海鹽縣人嘉靖癸未進士任兵部武選司主事十七年改吏部考功十八年改文選本年陞稽勲司員外郎十九年改驗封二十年改考功又改文選陞驗封郎中改考功二十二年改文選忤輔臣謫和州同知陞南太僕寺寺丞陞南京吏部考功司郎中二十六年陞南京尚寶司卿二十八年陞南京太僕寺少卿二十九年陞南京鴻臚寺卿三十一年陞南京光祿寺卿三十三年陞南京太常寺卿尋推刑部右

侍郎未任改兵部右侍郎兼右僉都御史總督漕運三十四年陞吏部左侍郎三十五年推南京吏部尚書未任改都察院右都御史兼兵部左侍郎協理戎務

國朝列卿紀卷之一百二

總理河道敘

夫憲臣治河者非古制也自大禹作司空平水土至成周以司空掌邦土並重其事秦漢有都水長丞主陂塘灌溉保守河渠自太常少府及三輔皆有其官漢武帝以都水官多乃置左右使以領之成帝河平元年又命王延世爲河隄使者以隄成賜爵關內侯至哀帝省使者官至東京凡都水皆罷之晉有都水臺使者梁有大舟卿隋唐有河渠署令丞各一人至玄宗開元十六年以宇文融充九河使而其任始重宋太祖乾德五年念河渠潰決爲民患詔開封等十七州長吏兼本州河隄使太宗

與國二年河決命左衛大將軍李宗矩往治九年河決又命侍衛步軍都指揮使田重進往治真宗咸平三年命隄防轉運使勿委以他職仁宗天聖五年命轉運使五日一奏河事至和二年命龍圖閣直學士施昌言總領其事哲宗元祐元年命秘書監張問相度河北水勢元符二年又命張商英爲龍圖閣侍制河北都轉運使兼專功提舉河事南渡以降皆以京朝官三班使臣充亦有以本處監當兼掌者元仁宗元祐十一年又特命工部尚書賈魯爲總制河隄使進秩二品然歷代治河特謹水患而已非賴之以濟漕運惟元都於燕至元末以江南貢賦未達於都始從郭都水議自濟寧至臨清開渠數百里引水入御

河直抵通州濟漕名曰會通河於是終元之世公私漕販南北無阻爲國家大利國朝建都金陵漕運事寢所謂堰築崩壞淤塞殆盡及用兵梁晉間使大將軍徐達開塌場口入於泗以通運道後因河口壅淤乃修師家莊石佛諸閘又開濟寧州西耐牢陂接引西鄆黃河水以通梁晉之粟永樂初徙都北京貢賦仰資東南悉由海運糧艘往往淪沒風濤九年以濟寧州同知潘叔正言特命工部尚書宋禮同都督周長等發山東丁夫鑿會通河又同刑部侍郎金純開黃河故道自開封城北起下達鄆城至魚臺塌場口以入漕河至十年始議會通河僭運北京至十三年遂罷海運而平江伯陳瑄亦疏鑿淮揚一帶南至

漕運遂會通矣。繫後河道奔潰壅溢，數省繹騷。間遣部院大臣往治，事畢則罷。其運河自濟寧分南北界，或差左右通政少卿，或都水司屬分理。又遣監察御史錦衣衛千戶等官巡視其沿運河之閘泉及徐州呂梁二洪，皆差官管理。或以御史，或以郎中，或以河南按察司官，後皆革去。而止設主事。三年一代，然皆爲漕運之河，不爲黃河也。惟總督河道大臣，則兼理南北直隸河南山東等處黃河，亦以黃河之利害與運河關也。總督之名自成化弘治間始。或以工部侍郎，或以都御史。至正德四年，以來定爲額員。專命憲臣提督，常於濟寧駐劄。凡漕河事悉聽專掌官。區處他官不得侵越。凡所徵椿葺，折徵銀錢，備河道之

一用者，毋得以別事擅支。凡府州縣添設通判判官主簿閘壩官，專理河防，不許別委。凡府州縣管河及閘壩官有犯，行巡河御史等官問理。別項上司不得徑自提問。其視前代，豈不益重哉。我國家漕河形勝，誠天造地設。而有所待者，夫自通州以至儀真，凡三千里。而南旺分水適當其中。南由閘抵徐州，則會黃河至淮安入海。而揚州湖水接之，以達於江北。北由閘抵臨清，則會衛河至天津入海。而通州白河接之，以達於京。南北地理之遠近，旣侔而水道之接濟亦類。雖圖畫亦不能盡其妙。誠天下河道第一形勝。我聖朝億萬載無疆之業也。彼胡元烏足以當此第時異勢殊，弊由法起，名爲轉輸而變爲直達。旣乃公私

交征軍疲民困至使論者復有於海於陸之思則豈先朝之  
初意然哉今詳各官宦履於後其行實見於事紀其勲德茂著  
者表爲列傳

國朝列卿紀卷之一百二

總理河道尚書侍郎都御史年表

宋

禮

河南永寧人太學生永樂九年  
以工部尚書治河詳工部尚書

金

純

直隸泗州人大學生永樂九年以刑部  
左侍郎濬黃河詳禮工刑三部尚書

張

信

河南祥符人解元永樂九年以工部右  
侍郎濬河十二年謫交趾詳兵部侍郎

蔣廷瓚

直隸滑縣人薦舉永樂九年以工部右侍郎濬  
河十一年出爲貴州左布政使詳工部右侍郎

劉

觀

直隸雄縣人進士永樂十五年以左  
都御史督漕河詳都察院左都御史

藺

芳

山西夏縣人孝廉永樂十五年以工部  
右侍郎疏河本年卒於官詳工部侍郎

黃

福

山東昌邑人舉人宣德四年以工部尚  
書兼詹事整理河道詳南京戶部尚書

石

璞

河南臨彰人舉人正統十二年以工  
部尚書治張秋沙灣詳兵部尚書



王永和 直隸崑山人鄉舉正統十三年以工部右侍郎治沙灣詳兵部尚書

王文 直隸東鹿人進士景泰三年以右都御史治沙灣詳內閣

徐有貞 直隸吳縣人進士景泰四年以右僉都御史治沙灣六年加左副都回院詳內閣

陳泰 福建光澤人解元景泰五年以左僉都御史治徐揚洪河詳總督漕運右副都

薛遠 直隸無為人進士天順四年以工部右侍郎治南決河成化六年以尚書行視漕河詳南京兵部尚書

李顥 廣東博羅人進士成化六年以工部右侍郎治武清決河本年致仕

喬毅 山西樂平人進士成化六年以工部右侍郎治漕河詳工部左侍郎

王恕 陝西三原人進士成化七年以南京刑部左侍郎巡視河防詳吏部尚書

杜謙 直隸昌黎人進士成化十八年以工部左侍郎治徐河二十三年致仕

白昂 直隸武進人進士弘治三年以刑部右侍郎治原武決河并開高郵河詳刑部尚書

陳政 江西新昌人天順甲申進士弘治五年以工部左侍郎兼左僉都治張秋河本年卒於官

劉大夏 湖廣華容人進士弘治六年以右副都御史治張秋河詳兵部尚書

張縉 山西陽曲人進士弘治七年以右通政治河十三年陞保定巡撫詳南京戶部尚書

韓鼎 陝西合水人成化辛丑進士弘治十三年以右通政督理河道

崔巖 湖廣郴州人進士正德三年以工部右侍郎督理河道詳工部左侍郎

以後永設

李堂 浙江鄞縣人成化丁未進士正德四年以工部右侍郎兼右僉都任六年致仕

劉愷 直隸新安人進士正德七年以右副都御史任詳禮部尚書掌通政司事

趙璜 江西安福人進士正德十年以工部右侍郎兼僉都御史任詳工部尚書

龔弘 直隸嘉定人成化戊戌進士正德十二年以右副都任十六年加工部右侍郎兼僉都仍任本年致仕

李瓚 山東濮州人進士正德十六年以工部右侍郎任詳戶部總儲尚書

章拯 浙江蘭谿人進士嘉靖三年以右副都

盛應期 直隸吳江人弘治癸丑進士嘉靖六年以右都御史任八年被劾免

潘希魯 浙江金華人進士嘉靖七年以工部右侍郎兼左僉都任詳兵部左侍郎

李緋 河南固始人弘治乙丑進士嘉靖十年以右副都任十一年開任

戴時宗 福建長泰人進士嘉靖十一年以右僉都任本年致仕後起撫鄖陽詳都察院右僉都

朱裳 直隸沙河人正德甲戌進士嘉靖十二年以右副都任十三年丁憂

劉天和 湖廣麻城人進士嘉靖十三年以右副都任十四年加工部右侍郎兼僉都仍任詳兵部提督團營

李如圭 湖廣澧州人弘治己未進士嘉靖十五年以右副都御史任詳戶部尚書

于湛 直隸金壇人正德辛未進士嘉靖十五年以右副都任十七年丁憂見戶部侍郎

胡纘宗 陝西泰安人正德戊辰進士嘉靖十七年以右副都任詳河南巡撫

朱裳 詳前嘉靖十八年再起任前職本年免

郭持平 江西萬安人正德丁丑進士嘉靖十八年以右副都任詳南京刑部右侍郎

周用 直隸吳江人弘治壬戌進士嘉靖二十一年以工部尚書兼右都任詳吏部尚書

韓邦奇 陝西朝邑人正德戊辰進士嘉靖二十三年以右副都任詳南京兵部尚書

于湛 詳前嘉靖二十四年再起原職任二十五年遷戶部右侍郎未任被劾聽調

詹瀚 江西玉山人正德丁丑進士嘉靖二十五年以右副都任詳刑部左侍郎

胡松 直隸績溪人正德甲戌進士嘉靖二十六年以右副都任詳工部尚書

王守 直隸吳縣人嘉靖丙戌進士二十七年以右僉都任詳南院右副都

方鈍 湖廣巴陵人正德辛巳進士嘉靖二十七年以右僉都任詳戶部尚書

何鰲 浙江山陰人正德丁丑進士嘉靖二

汪宗元 湖廣崇陽人嘉靖己丑進士二十九年以右

連鑛 直隸永年人嘉靖丙戌進士三十

曾鈞 江西進賢人嘉靖壬辰進士三十一

胡植 江西南昌人嘉靖乙未進士三十四年以

孫應奎 浙江餘姚人嘉靖己丑進士三十

王學益 江西安福人嘉靖己丑進士歷南院右都三十

王廷 四川南充人嘉靖壬辰進士三十

林應亮 福建侯官人嘉靖壬辰進士三十九

胡植 詳前嘉靖四十年再任本年改北

孫植 浙江平湖人嘉靖乙未進士十四

王士翹 江西安福人嘉靖戊戌進士四十年以僉都

陳堯 直隸通州人嘉靖乙未進士四十三年以工

孫慎 直隸大寧都司人嘉靖甲辰進士

潘季馴 浙江烏程人嘉靖庚戌進士四十

朱衡 江西萬安人嘉靖壬辰進士四十五年以工部尚書兼

翁大立 浙江餘姚人嘉靖戊戌進士隆慶二

陳大賓 湖廣江陵人嘉靖甲辰進士隆慶四年

潘季馴 見前隆慶四年

萬恭 江西南昌人隆慶五年以兵

傅希摯

直隸衡水人嘉靖丙辰進士萬曆二年由巡撫山東以右僉都總理河道提督軍務五年改撫陝西

李世達

陝西涇陽人嘉靖丙辰進士萬曆五年由巡撫山東僉都陞右副都任本年裁革

楊俊民

山西蒲州人嘉靖壬戌進士萬曆十三年以總督漕運兼管河道十四年回部

總理河道行實

宋禮字大本河南河南府永寧縣人由大學生授山西按察司

僉事改刑部員外陞禮部侍郎累官工部尚書永樂九年命同

都督周長等發山東丁夫一十五萬登萊二府願趨事赴功之

人一萬五千疏鑿會通河先是洪武二十四年河決原武縣黑

陽山舊曹州兩河口漫過安山湖而會通河遂淤自濟寧至臨

清三百八十五里舟楫不通乃於濟寧迤北置城村等遞運所

凡軍需錢糧之輸北者悉陸運至德州凡七百里始入衛河至

是疏鑿之又塞舊曹州鄆城兩處河口濬沙灣至舊曹州一帶

河道又同刑部左侍郎金純等督河南運水夫開黃河故道自

開封城北起下達鄆城至魚臺縣塌場口入於漕河又疏山東七十二泉匯於分水故本年太宗降綸音一章曰工部錦衣衛便差四箇官鋪馬裏去都齊到那黃河新開口子處討兩隻船從那里看將下來到舊曹州兩河口分開一路往會通河一帶去一路往穀亭這一帶來看那兩條河的水勢行的如何還看那黃河水比先是那一處漫過安山湖那一帶去淤塞了河道若是那原漫過水處隄岸低薄時就着再整治得高厚着不低薄時罷將文書去與宋尚書每知道欽此則其委任之重亦可見矣先是朝廷開河道不過欲通天下貢賦未專於漕運也十年宋公始議會通河僨運北京其奏狀曰永樂十年某月

某日工部尚書宋禮奏海運糧儲每年五月太倉開洋直沽下卸待秋回京船隻中多被損壞亦有漂失不見下落者俱用修理補造分派江西湖廣浙江等布政司并直隸徽州府軍衛有司相兼修造俱限次年三月終完備駕赴太倉應用因限逼迫措料不及不免科斂鈔物買辦其間作弊受害者不可勝言造船者惟顧眼前之急不慮速成不堅之患計其所費物料人工又難細舉且如造下料海船一隻用百人駕使止運得米一千石若將用過人工物料估計價鈔可辦二百料河船二十隻每隻用軍二十名運糧四千石以此較之從便則可如將鎮江鳳陽淮安揚州四府歲徵糧米定撥七十萬石赴徐州并兗州府

糧米三十萬石赴濟寧州交納差撥近河徐州等衛旗軍一萬名各委指揮千百戶管領工部撥與二百料淺船五百隻一如衛河事例將前項倉糧從會通河僱運供給北京每三年海運二次使造船者無逼迫之患駕船者獲堅久之利以兩河并海運計之三年可得八百餘萬十年之間國有足食之備民無繁擾之憂至十二年遂罷海運而平江伯亦疏鑿淮揚一帶南北遂會通矣至今為國大利而宋禮之功當為第一都督周長侍郎金純亦不可不謂之賢勞厥後傳謂宋公有微過朝廷督責之革其冠帶止服儒巾治事其權中微而平江伯之功愈彰故今人惟頌平江而不及宋禮故丘文莊公嘗過會通河有

感賦詩曰清江浦上臨清聞簫鼓叢祠飲餽餘幾度會通河上過更無人語宋尚書後李文正公各有詩其意在言表矣餘詳

南京工部

金純字德修直隸鳳陽府泗州人由大學生擢吏部文選司郎中累官刑部左侍郎永樂九年命看視河勢先是洪武元年

太祖高皇帝用兵梁晉間使大將軍徐達開塌塌口入於泗以通運道後因河口壅塞淤乃修師家莊石佛諸閘又開濟寧州西耐牢坡接引曹鄆黃河水以通梁晉之粟後故道復塞至是命純發河南運木丁夫開濬故道自開封城北引水下達鄆城復入魚臺塌塌口出穀亭北十里以修太祖時故事今所謂永

通廣運二閘也十年回京累官刑部尚書詳刑部

張信字懋孚河南開封府祥符縣人革除己卯解元永樂九年以工部右侍郎濬河道十二年謫交趾詳兵部

蔣廷瓚字邦瑞直隸大名府滑縣人永樂九年以工部右侍郎濬黃河十一年出爲貴州左布政使詳工部

劉觀字直隸保定府雄縣人洪武乙丑進士永樂十五年以都察院左都御史會提督漕河浚壅淤以便糧艘令行禁止而漕行不滯本年回院宣德三年以賊貪命巡視河道四年下獄詳都察院

藺芳字山西夏縣人永樂十五年以工部右侍郎提督漕

河之事本年卒於官詳工部

黃福字如錫山東萊州府昌邑縣人宣德四年以工部尚書兼詹事命整理河道五年回京調行在戶部歷南京戶部尚書叅贊機務詳南京戶部

石璞字仲玉河南彰德府臨彰縣人正統十三年以工部尚書命治沙灣決河不能成功本年回部歷兵部尚書詳南京都察院

王永和字以正直隸蘇州府崑山縣人永樂甲午舉人歷兵部都給事中正統十三年以工部右侍郎命治沙灣決河不能成功本年回部詳工部

王文字千之直隸保定府束鹿縣人正統十三年以都察院右都御史命績治沙灣決河不能成功本年回院歷左都御史改吏部尚書詳內閣

徐有貞字元玉直隸蘇州府長洲縣人宣德癸丑進士累官左春坊左諭德兼翰林院侍讀景泰四年冬十月十一日景皇以河決沙灣七年久弗克治集左右丞弼暨百執事之臣於文淵閣議舉可治水者僉以有貞應詔乃錫璽書命行之有貞祇承明命戒吏飭工撫用士衆咨詢羣策率興厥事已乃周爰巡行自北東徂南西踰灣汶沿衛及沁循大河道濮洸以還既究厥源因度地行水乃上陳於上曰臣聞用平水土其

要在得天時地利人事而已天時既經地利既緯而人事於是乎盡且夫水之爲性可順焉以導不可逆焉以湮禹之行水行所無事用此道也今或反是治所以難蓋河自雍而豫出險隘而之夷曠其勢既肆又由豫而兗土益疏水益肆而沙灣之東所謂大洪之口者適當其衝於是決焉而奪濟汶入海之路以去諸水從之而洩隄以潰渠以淤澇則溢旱則涸此漕途所謂阻者然欲驟而堙焉則不可今欲救之請先疏其水勢平乃治其決決止乃濬其淤因爲之方以時節宣俾無溢涸之患必如是而後有成制曰可有貞乃經營焉作治水之牒疏水之渠起張秋今隄之首西南行九里而至於濮陽之樂又九里而至



於博陵之隄。又六里而至於壽張之沙河。又八里而至於東西影塘。又十有五里而至於白嶺之灣。又三里而至於李準之涯。由李準而上。又二十里而至於竹口蓮花之池。又三十里而至於大瀦之潭。乃踰范暨濮。又上而西。凡數百里。經澶淵以接河沁。河沁之水。過則害。微則利。故遏其過而導其微。用平水勢。既成名。其渠曰廣濟。牒曰通源。渠有分合。而牒有上下。凡河流之旁出而不順。則堰有九。長袤皆至萬丈。九堰既設。其水遂不東衝。沙灣乃更北出。以濟漕渠之涸。阿西鄆東曹南鄆北沮洳而資灌溉者。爲頃百數十萬。行旅既便。居民既安。有貞知事可集。乃參綜古法。擇其善而爲之。加神用焉。爰作大堰。其上建以水

門。其下繚以虹隄。堰之架濤截流。柵木絡竹。實之石而鍵之。鐵蓋合。土木火金而一之。用平水性。既乃導汶泗之源。而出諸山。匯澶濮之流。而納諸澤。遂濬漕渠。由沙灣而北。至於臨清。凡二百四十里。南至於濟寧。凡二百一十里。復作放水之牒。於東昌之龍灣魏灣。凡八爲水之度。其盈過丈。則放而淺之。皆通古河。以入於海上。制其源。下放其流。既有所節。且有所宣。用平水道。由是水害以除。水利以興。初議者多難其事。至欲棄渠弗治。而由河沁及海。以漕然卒不可行也。時又有發京軍疏河之議。有貞因奏。蠲瀕河州縣之民馬役庸役。而專事河防。以省軍費。輕民力。天子從之。是役也。凡用人工。聚而間役者。四萬五千有

竒分而常役者萬三千有竒用木大小之材九萬六千有竒用竹以竿計倍木之數用鐵爲觔有十二萬鈹三千紐百八釜二千八百有竒用麻百萬荆倍之藁秸又倍之而用石若土則不計其筭然其用糧於官以石計僅五萬而止自始告祭興工至於工畢凡五百五十有五日承命於景泰癸酉之冬經始於甲戌之春施工於乙亥之夏而告成之於秋上詔見奉天門嘉勞焉因命之居京管臺事丙子春有貞請勅載至乃擴前功益爲大水之備時方曠乾衆莫喻其意頗以爲過防及秋而大水洊至泗汶淇衛河沁一時俱溢環東兗之間若海之浸者三月逮冬始平運河南北千餘里故隄高岸之缺而不完者無慮百數十所而沙灣之正隄大堰獨巋然而存疑然而安其旁近之城郭田疇皆恃焉而免墊沒之患以水之來有所捍而去有所洩也於是東兗之軍民耆老合辭以請今茲之水蓋洪武以來所未嘗有而

之人所未嘗見也今隄與堰爲之保障非牐與渠爲之排解吾田吾產其池潢矣吾耄吾倪其魚鱉矣然水之變不測今茲之溢以龍灣六牐洩之而猶未盡也以故感應祠之缺隄又須公爲之救築焉而益爲之防焉有貞曰唯唯月中旣築感應祠之缺而作堰月之隄鱉甲之堰比沙灣水門大堰差小而埽法略等復行度東昌龍灣六牐之上官審之口置牐一穿新渠而屬之東平載廟之津置牐一疏古河而屬

之

之大清并前六牓爲八而皆注之海焉乃探禹之遺秘本星土  
經緯之理鑄玄金而作法象之器建之隄表大河感應二祠之  
中以爲悠久之鎮蓋盡人事符天造制物宜假羣神其道并行  
也既訖工有貞復回院後入閣詳內閣

陳泰字吉亨福建邵武府光澤縣人永樂癸卯舉人景泰五年  
以都察院左僉都御史疏理徐州呂梁二洪及儀真至濟寧諸  
處河道七年改撫蘇松等府詳總督漕運

薛遠字繼遠直隸廬州府無爲州人天順四年以工部右侍郎  
命治河南決河回部改戶部歷左侍郎總儲尚書成化六年仍  
命治河南本年回部歷南京兵部尚書詳南京兵部

李頤字思誠廣東惠州府博羅縣人正統丙辰進士授戶部

司主事改刑部

年陞

司員外郎十四年陞福建僉事

景泰六年陞福建左叅政天順年陞山東右布政使四年陞浙  
江左布政使成化二年陞工部右侍郎六年命治武清決河本  
年致仕詳工部侍郎

喬毅字志弘山西太原府樂平縣人正統戊辰進士擢吏科給  
事中歷大理寺左少卿成化六年以工部右侍郎命治漕河時  
亢旱水淺舟膠檄有司加工疏濬齋沐禱於江海之神江潮汜  
湧入漕河運船乘潮通行人謂精神所感八年遷工部左侍郎  
詳工部

王恕字宗貫陝西西安府三原縣人成化八年以南京刑部左侍郎命巡視河防恕奏揚州一帶全藉湖水議將河身比湖身濬深三尺則湖水自來雖旱亦可不阻船又高郵湖每遇西風損壞船隻議濬內堤作外堤以便行船修復閘座從之九年改南戶部遷都察院左副都御史巡撫雲南歷右都御史改南院右都御史南京兵部尚書致仕後起吏部尚書詳吏部

杜謙字益之直隸永平府昌黎縣人正統丁卯領順天鄉薦會試不偶以國子生歷事戶部特山陽金濂爲尚書待下方嚴獨奇謙欲奏薦爲屬謙力辭之景泰甲戌登進士朝廷修寰宇通志遣采事實於山東還授工部都水司主事督呂梁洪七年

改禮部主客司三年考最受勅進階承德郎天順庚辰陞本司署員外郎癸未陞郎中本年以父憂去任成化三年服除改儀制司郎中成化戊子冊封晉府充副使五年詔廷臣三品以上各舉所知時姚夔在禮部知謙才可用卽以名上擢浙江布政司右叅議乙未陞本省右布政丁酉轉左布政使庚子召爲順天府尹壬寅陞工部左侍郎甲辰漕河淤卽以命謙方見嚮用丁未勘事大同還乞致仕益謙年六十九矣旣還鄉以詔恩進資善大夫以爲榮而謙尤康強不衰凡八年以疾不起享年七十有六謙居官善理事爲工部主事時在徐州值歲饑疾區畫荒政作粥食人多所全活推其餘及牧養孤老

男女過時而貧不能嫁娶者皆出所助呂梁之人至今思之而平生政績尤多在浙江時平易明決既能使民懷而吏畏至於賓接士人忘其勢分而禮法之際有所不可雖顯要亦不肯阿從也初各省以織造上供文綺不如法者獲重譴衆因畏避至積數年所織造者久而濕蒸多壞工人或破家不能償謙曰利吾身以害人吾不忍也遂合數郡解運卒亦無事人始免患嘗清理軍伍有訴於御史得更衛者謙以爲非例持其文不下御史雖恚不怒也他日定賦役等第按察使欲增損其則而益貧無產之家謙以此輩皆游民而令賦役歛歸於力穡之農非重本抑末之意卒從謙議歲侵特奏免田租若干舊有起運存留

之數戶部以起運者不可免而止免存留者謙言若然則一省官俸軍餉俱乏矣二者必增損之乃可執奏不已朝廷亦竟從之及在工部適運河淤塞受勅修濬因以其屬從行得便宜行事謙盡心水利不憚勞苦數月舟行無阻公私稱便已而兵部尚書余子俊巡撫大同多費公帑物有誣其侵漁者時受勅偕給事中御史往覈其實或謂謙曰上怒叵測公與余有浙省同僚之舊辭之可免禍謙曰吾知奉公守法而已他何足計頻行又有以危言怵之者亦不顧卒得其實而還余之事竟白其幹濟如此者故凡被委命事竣輒受賜賚云居家事親能盡子道父嘗病疽醫莫敢療泣禱於天躬吮之良久愈後父年

國朝列傳卷之二十一  
九十猶就養於官以浙地善且迎其兄姊事之人稱其孝友者無間言自少無聲色之奉雖退食燕居必正襟端坐妻子不敢狎視至接人臨下更溫厚可親是以人皆愛之又待人不以升沈易節在呂梁時商文毅以罪罷遇之尤厚後商入相每汲引之

漕志云徐州洪舊名百步最爲險要成化癸卯甲辰自春夏而秋亢暘少雨洪流不絕者一脉或稍漲亂石中四泄而下舟楫上下惟艱是年秋募工伐石於山八月戊寅輦石作隄工未竟工部左侍郎杜公益之檄濬茶城河將大衆相河身之生地因其直而鑿之俾就故道至乙巳三月畢工再兩越月石隄始成

長通八千丈闊計三丈許自是減洪夫歲辦草束三分之一下洪障水舊用草壩上覆以土更砌以石延袤一百餘丈廣一百一十五丈引中流水涸出露若大花小花鴨子材諸石凡傷舟者漸次鑿去計三十餘處

白昂字廷儀直隸常州府武進縣人天順丁丑進士累官刑部左侍郎弘治二年秋河決汴金龍口溢於山東損運道山東守臣上其狀天子勅昂以戶部左侍郎往治昂奏分揚州管河通判居瓜洲鎮使軍民有所統一又奏濬瓜洲儀真壩口至揚州灣頭運河既訖工乃視運道自山東抵揚州議所治濬治時監察御史孫行工部郎中吳瑞董河事與巡撫右副都御史李

昂漕帥署都督僉事都勝署都指揮同知郭鉉合議高郵州運道九十里而三十里入新開湖湖東直南北爲隄舟行其下自國初以來障以椿木固以磚石決而復修者不知其幾其西北則與七里張良珍珠甕社諸湖縈迴數百里每西風大作波濤洶湧舟與沿隄故椿石遇輒壞多沈溺前此董河事者嘗議修湖東鑿復河以避風濤便往來今舉運河便利宜莫先於此者昂議允遂相地與工開鑿起州北二里之杭家嘴至張家溝而止長竟湖廣十丈深一丈有奇而兩岸皆壅土爲隄椿木磚石之固如湖岸首尾有閘與湖通岸之東又爲閘四爲涵洞一每湖水盛時使從減殺焉以三年三月始事凡四閱月而成自是舟經高郵者人獲康濟昂因採衆議聞之上名曰康濟河往來便焉後官至刑部尚書詳刑部

陳政字以正江西瑞州府新昌縣人天順壬午領江西鄉薦甲申登進士第初授工部營繕司主事遇事輒區處得宜有豪右侵占畿內官地反誣隣僧者往勘得實皆感服及監收薪炭出納公平無敢厚取以自私者夫役德之將受代爭赴闕下言政不可去遂復留一年績譽日著成化三年姚文敏公爲吏部乃奏改文選司主事辛卯陞驗封司員外郎丁酉充副使封遼府長垣王戊戌陞郎中本年推選補通政司右叅議庚子轉左叅議壬寅進右通政癸卯丁內艱服除轉左通政丁未擢工部

右侍郎本年轉左侍郎是年八月 憲宗升遐奉 勅營建山陵上疏以衰老辭不允 上念督工之勤累遣中使以 璽書下勞并賜羊酒白金等物及工完所以勞賜之者尤厚巳酉京師大水奉 命督修蘆溝橋及內外倉廩之傾圮者辛亥禮部災督工修建皆有勞賜弘治壬子河溢汴梁之東蘭陽鄆城諸縣皆被其患勢迫運道殆不可支議者以地兼河南山東及南北兩畿事不統攝宜得大臣總理庶克有濟 上命政往令兼都察院右僉都御史 賜以璽書而行政泣其境方將度地勢以圖修浚行至儀真俄疾作遂卒享年五十四計聞 上命有司諭祭仍治葬事

劉大夏字

湖廣華容縣人天順甲申進士累官都察院右

副都御史初安平鎮舊名張秋實運河要地景泰間黃河支流

決鎮之沙灣壞運河 朝廷命都察院右僉都御史徐有貞塞

而隄之弘治六年復決於下流十里許汶水從之由東阿舊鹽

河以入於海厥後霖潦大溢廣至九十餘丈運河自東昌而下

率多淤涸舟楫不通 孝廟以為憂勅大夏往治之又特 勅

內官監太監李興平江伯陳銳總督山東兵民夫役與之共事

時夏且半漕舟已集一經決口輒力數倍稍失手輒覆溺不可

救僉謂宜急先務乃於西岸稍南鑿月河長三里許引舟中之

次第皆濟及冬水落乃為塞決計規效古法酌以時宜築東西



二臺植木椿爲表多施大索用船雜置土石鑿而沈之壓以巨掃囊土以實其罅役夫番代閱三晝夜弗息而決始塞其外則甃石樹杙累築而固之又於其南爲石壩以備宣節又上疏賈魯河孫家渡塞荆隆口黃陵岡築兩長堤感水南下由淮徐故道又議以爲兩隄綿亘甚遠河或失守必復至張秋爲漕河憂乃相於舊決之處一里用近世減水壩之制植木杙中實磚石上爲衝水著以厚板又上漫以巨石屈鐵以鍵之榆柳以植之壩成廣袤皆十五丈又其上甃石爲竇五梁而涂之梁可引纜竇可通水俾水溢則稍殺衝嚙水涸則漕河獲濟庶幾役不重費而功可保工旣告畢上更命鎮爲安平賜興歲祿二十四

石加銳太保兼太傅增歲祿二百石遷大夏爲左副都御史佐院事又命工部伐石勅內閣臣爲文各紀功績命大學士李東陽記之累官兵部尚書詳兵部

張縉字朝用山西太原府陽曲縣人成化己丑進士歷山東叅政弘治癸丑河決張秋上命平江伯陳銳都御史劉大夏治之百需悉委調度甲寅功成遂陞其秩爲通政司右通政屬之行河時衝決之餘溝防不治縉相其緩急以漸修濬無所遺又於決口之東甃石岸數里以圖勿壞又新築南旺東隄樹柳其上每歲夏秋水溢挽卒得分行無阻至今便之庚申八月陞都察院右僉都御史巡撫保定等府詳南京戶部尚書

韓鼎字廷器陝西合水縣人成化辛丑進士擢禮科給事中丁未陳公銓選等四事差陝西寧夏給散賞賚盡革侵漁之弊戊申遷右給事疏却貢獅廣儲嗣上優詔答之進左給事論太常卿丁永中等由黃冠濫金紫神樂觀董素雲竊祭服火藏滅跡眾論快之親藩婚禮 詔給鹽一萬引為助疏言大壞鹽法請令有司給價與之詔如其言時 詔求言乃陳謹大要崇節儉五事又因星變極陳時弊指斥貴近 上皆嘉納遷通政司叅議乙卯陳言剴直調南京尚寶司卿尋改南京通政司左叅議庚申擢右通政駐安平鎮督理河道申明禁例不為貴勢所奪又置朱家淺等閘使水有節縮濬汶上萊蕪諸泉及淤河運舟賴之隄南旺湖以障泛濫民得耕種其湖田流徙復業乙丑擢通政使督易州廠

崔巖字民瞻湖廣郴州人成化辛丑進士授戶部山西司主事弘治元年陞陝西司員外郎三年陞本司郎中五年陞山東左叅政十三年陞江西右布政使十五年歷陞河南左布政使正德元年陞都察院右副都御史巡撫大同地方三年改撫陝西等處地方本年陞工部右侍郎總理河道四年陞工部左侍郎五年致仕

李堂字時升浙江鄞縣人成化丁未進士正德四年由南京光祿寺卿陞南京都察院左僉都御史 勅整江南北舊制舟師

未幾陞工部右侍郎凡大舉措必竭兩端開誠商論共成國是  
兩奉 璽書督修京倉落成汴徐河患告急 勅兼左僉都御  
史總理修濬抵曹縣因已集人夫築長隄自大名至沛縣二百  
餘里又自滎澤抵永城縣疏通水道以防潰決是時洊罹劉六  
劉七兵荒言官乞暫取回京 詔可之瀕行會計河南工費二  
千兩外山東存積并追完各處缺工之數共銀五萬兩有奇收  
庫作國正計不許擅支後從巡撫便宜發此銀築汴城外郭防  
禦流賊民恃無恐存遺惠焉歸 命於朝坐大學士梁公儲尚  
書李公燧迎合廖張意朋計下石先幾引疾 詔許乘傳還鄉  
痊日有司勸駕 乾清宮災朝議起之不果詳工部侍郎

劉愷字

直隸保定府新安縣人弘治庚戌進士正德七年

任太常寺卿陞都察院右副都御史總理河道十年改兵部右  
侍郎掌通政司事十三年加禮部尚書掌司事愷之用不由選  
部給事中周用論之詳通政司

趙璜字庭實江西吉安府安福縣人弘治庚戌進士正德十年  
以工部右侍郎兼僉都御史任船趨河上率官民胼胝水勢稍  
退貽文河伯與共責任數日狂流壅沙護岸三埽告成人以爲  
神十一年改撫順天詳工部尚書

龔弘字

直隸蘇州府嘉定縣人登成化戊戌進士授嚴州

府推官二十一年陞南京刑部雲南司主事弘治三年陞廣東

司員外郎五年陞南京吏部文選司郎中七年陞兗州府知府十四年陞浙江右叅政十五年致仕正德九年改福建右布政使十年陞湖廣左布政使十一年陞應天府尹十二年陞都察院右副都御史總理河道十六年加工部右侍郎兼僉都御史仍舊任本年致仕

李瓚字  山東東昌府濮州人正德十六年以工部右侍郎任嘉靖二年遷戶部歷總儲尚書詳戶部

章拯字以道浙江蘭谿縣人弘治壬戌進士嘉靖三年以撫治鄭陽右副都御史改任六年加工部右侍郎適河變南旺一路運舟盡膠於沙拯露禱於泰山泉水忽湧繼以天雨河漕獲達

時有議開新河拯謂宜於單豐沛築堤不使淤漕渠烏可輕易廢百數十里之田朝議不協本年改命提督顯陵工程歷南京工部尚書詳工部

盛應期字斯徵直隸蘇州府吳江縣人弘治癸丑進士授工部都水司主事十年降雲南縣丞十四年陞祿豐知縣十六年陞順慶府通判正德元年陞武昌府同知本年丁憂四年補長沙府同知本年陞雲南副使十年陞河南按察使十一年陞山東右布政使十三年陞陝西左布政使十四年陞都察院右副都御史巡撫四川地方十五年丁憂嘉靖元年起撫江西地方三年陞兵部右侍郎兼右僉都御史總制兩廣軍務兼理巡撫剿

平劉召函首軍門四年回籍後起工部右侍郎督易州山廠六年陞都察院右都御史總理河道八年劾免

潘希魯字仲魯浙江金華府金華縣人弘治壬戌進士授兵科給事中歷提督四夷館太常寺卿陞南贛右副都御史嘉靖七年以工部右侍郎兼左僉都御史任曾考故詢謀相度要機以濟沛之淤由決河西衝掣閘河之水入昭陽湖不復南流而飛雲浦之水北漫故沙停而淤乃加築東隄以遏入湖之路築西隄以防黃河之衝費省而功速成十年改兵部歷左侍郎詳兵部

李緋字

河南汝寧府固始縣人弘治乙丑進士授戶部福

建司主事正德四年丁憂七年補戶部湖廣司主事八年丁憂十二年補戶部廣東司主事本年陞四川司員外郎十三年陞山西司郎中嘉靖八年歷陞山東右布政使九年陞山東左布政使十年陞都察院右副都御史總理河道十一年閑住

戴時宗字

福建漳州府長泰縣人正德甲戌進士嘉靖十

年任大理寺少卿十一年以右僉都御史任本年改撫順天致

御史蒙著尊德性道問學論

朱裳字公垂直隸順德府沙河縣人正德甲戌登進士擢

道監察御史巡山西鹽法錢寧來求利拒不與有倖人奏討司空石公曰爾徒徃朱御史不允汝也時御史王相被閹鑑構下

獄君抗疏曰。朝廷設御史如齊民畜猫捕鼠。猫鼠相持。主人其可助鼠耶。疏鑑八罪。王得從輕刑。又勸。上戒佚樂。近儒臣。武皇巡幸。諸司請大治備以候君。不許。後果有重斂。獲譴者。人曰。如朱公在。免此矣。還。朝。又諫止南巡。數嬖人熒惑之禍。十五年庚辰。出知鞏昌。以其故守治民儉而富安。乃教皆鮮鮮以生。嘉靖初。詔舉先朝故典。選天下方面知府治行高者。賜燕勞。止得八人。君爲鞏昌守。以清苦與列。後給事中劉世揚等舉。內外清正臣。大學士石瑤而下八人。君在中。嘉靖四年。陞浙江副使。御史王璜按浙。辟不畏勢。浙有重人冤璜罷官。君以副使至京。重人問璜何如人。君曰。真御史也。重人慚沮。七年。陞福建

按察使。十年。陞浙江左布政使。十二年。陞都察院右副都御史。總督河道。建牙於濟。十三年。丁憂。自都御史守制。還。寒約如寒。素居無賓堂。土壁席門。自奉常茹菜。十八年。再起原官。仍前任。本年夏五月。卒於官。性淳篤。朴直。斤斤懇懇。目之所見。必行。言而雖久可復。凡在官。鑰戶遠嫌。堂室如寺。妻子甘菲惡。君益自信。乃又窮經探賾。以聖賢自飭。謂尊德性。道問學。其的旨也。衍而成論。士頌其廉。知友服其不市名。民惠其不取。享年五十有八。

劉天和。字養和。湖廣黃州府麻城縣人。正德戊辰。進士。嘉靖十三年。由巡撫陝西。右副都御史。丁憂。起。右副都御史。任。十四年。

加工部右侍郎兼僉都御史仍前任本年取回部歷陞三邊總制左都御史南京戶部尚書改兵部尚書提督團營詳兵部

李如圭字

湖廣岳州府澧州人弘治己未進士嘉靖十五

年以右副都御史任十六年遷吏部右侍郎十七年歷戶部左侍郎總儲十八年陞南京工部尚書十九年改戶部尚書詳戶部

于湛字

直隸鎮江府金壇人正德辛未進士授兵部武選

司主事九年陞車駕司員外郎十一年陞職方司郎中十六年陞陝西右叅議本年改江西右叅議嘉靖元年陞雲南右叅政五年丁憂八年補河南右叅政九年陞山西右布政使十年陞

河南左布政使十二年陞都察院右副都御史巡撫順天未任

本年開任十五年起都察院右副都御史巡撫陝西地方十六

年改總理河道十七年終養丁憂二十四年起原職再任二十

五年遷戶部右侍郎未任被劾聽調二十六年起原職撫鄖陽

胡纘宗字

陝西鞏昌府泰安縣人正德戊辰進士任河南

左布政使嘉靖十七年以巡撫山東右副都御史改任十八年遷撫河南詳河南巡撫

郭持平字守衡江西吉安府萬安縣人正德丁丑進士任兵部

主事嘉靖三年改吏部考功司陞稽勲員外郎陞副使十八年

以右副都御史任二十一年加工部右侍郎兼僉都御史仍原

任二十二年遷南京刑部右侍郎詳南京刑部

周用字行之直隸吳江縣人弘治壬戌進士嘉靖二十二年以南京刑部尚書起工部尚書兼右都御史任疏請疏濬溝洫以防河決五事二十三年遷督漕運陞都察院左都詳吏部尚書韓邦奇字陝西西安府朝邑縣人正德戊辰進士四年任吏部考功主事五年陞本司員外郎六年改文選嘉靖十一年以按察司副使陞大理寺左少卿十二年陞都察院左僉都十四年陞巡撫遼東右副都御史未任改撫山西致仕二十三年起總理河道都察院右副都御史二十四年遷刑部右侍郎改吏部右侍郎二十五年陞南京都察院右都御史二十六年陞

南京兵部尚書

詹瀚字

江西廣信府玉山縣人正德丁丑進士嘉靖二十一年任撫治鄖陽右副都回籍聽調二十五年以右副都御史任二十六年遷刑部右侍郎歷左侍郎詳刑部

胡松字

直隸徽州府績溪縣人正德甲戌進士嘉靖二十六年以右副都御史任二十七年改總漕歷戶部右侍郎詳工部尚書

王守字履約直隸蘇州府吳縣人嘉靖丙戌進士十三年任太常寺少卿提督四夷館十七年陞大理寺左少卿十八年陞南京光祿寺卿二十二年陞撫治鄖陽右僉都御史二十三年改



督南京糧儲二十七年以右僉都御史任本年陞南院右副都御史詳南京都察院

方鈍字仲敏湖廣岳州府巴陵縣人正德辛巳進士嘉靖二十三年任大理寺右寺丞二十五年陞本寺右少卿二十六年轉左陞太僕寺卿二十七年以右僉都御史任二十八年遷南京大理寺卿二十九年陞南京戶部右侍郎三十年改戶部尋轉左三十一年陞戶部尚書

何鰲字  浙江紹興府山陰縣人正德丁丑進士嘉靖二十七年任應天府丞二十八年以右僉都御史任二十九年遷總督漕運詳刑部尚書

汪宗元字子允湖廣武昌府崇陽縣人嘉靖己丑進士授行人司行人陞南京工科給事中迴避改兵部武選司主事十八年陞尚寶司丞二十年歷本司少卿二十一年陞本司卿二十四年陞南京太僕寺少卿二十六年改南京鴻臚寺卿二十七年陞南京太常寺卿二十九年陞都察院右副都御史總理河道三十年降福建叅政三十五年任通政使連鏞字伯金直隸廣平府永年縣人嘉靖丙戌進士三十年以右副都御史任三十一年陞督漕運

曾鈞字廷和江西南昌府進賢縣人嘉靖壬辰進士授行人歷南京吏科給事中奕奕有重名陞雲南副使  年陞福建右

政 年遷廣東按察使 年陞福建右布政使 年轉

河南左布政使三十一 年陞總理河道右副都御史三十 年

陞工部右侍郎兼右僉都御史仍前任三十四年陞南京刑部

右侍郎三十六年致仕卒贈尚書謚恭肅

胡植字立之江西南昌府南昌縣人嘉靖乙未進士任御史提

督南畿學校二十九年陞大理寺右寺丞三十一年轉左本年

陞本寺右少卿三十三年轉左三十四年陞總理河道右僉都

御史三十五年丁憂四十年再任本年改都察院 僉都御史

未任陞總漕右副都御史本年調南光祿寺卿四十二年閑住

國朝列卿紀卷之一百二終

